

JEHOFA-JIREH 3

 Ke a go leboga, Ngwanešu Borders.

Le ka dula. Go no ba le kopanelo le Ngwanešu Harrel, modulasetulo wa kopano, le go hwetša gore ke moromiwa, gomme re mohuta wa go ba le dilo tša go swana. O ya morago bjale ka Lebopong la Gauta, Afrika. Gomme ke nepile go ba kua ngwaga wo. Re be re leka go hwetša se sengwe mmogo ka go etela Lebopo la Gauta morago ga go tla go tšwa Afrika Borwa.

2 Ke moo re bilego, se ke naganago, ye nngwe ya dikopano tše kgolokgolo, mo letšatšing la ka, e bile ka Afrika Borwa, ge re bone badudi ba batala ba dikete tše masometharo ba amogela Kriste ka nako e tee. Amene. Ba ba kgopetše go thuba medingwana ya bona ya maitirelo mo mobung, gore ka kgonthe ba e ra. Gomme ba thubile medingwana ya bona ya maitirelo, boka ledimo la lerole le etla godimo, gomme ba amogetše Kriste bjalo ka Mopholosi wa bona, kopanong e tee. Ba bile le go latela go gobotse godimo fale, kafao ba—ba ba swere.

3 Eupša pitšo ye kgolokgolo ya aletara ke kgonago go e elelwa, ya Morena a re filego, e be e le ka . . . e be e le godimo ka India, moo re bilego le e ka ba dikete tše makgolotlhano kopanong e tee. Gomme fao re—re be re no se kgone go akanya; feela bokgole bjo o bego o kgona go bona, e be e no ba mogohle. Gomme bohle ba bona ba amogetše Kriste bjalo ka Mopholosi, eupša ga go selo se tee go latela ka sona. Kafao kagona, nnete, ma—ma Masikh a tšere ya bona, Majain ba tšere ya bona, le go ya pele. Ke a thanka bontšintši bja bona ba ile morago, go boneng se sengwe Morena a se dirago le go tšweletša fale.

4 Bodiredi bja ka bjo Morena a mphago, ka Amerika ga bo na maatla kudu, feela batho ba Pentecostal. Bontšintši bja dikereke tša Amerika ke dikereke tša bohlale kudu, gomme ba dumela thutotumelo. Gomme moo e no ba moo ba dulago, o ka se ba šuthiše go tloga go yona.

5 Eupša ge o tšeа modudi wa setlogo le go leka go mmotša se sengwe ka ga thutotumelo, ebile ga a tsebe seatla sa go ja le sa nngele ke sefe. Ke botse bofe e bo dirago go mo fa thereke? O swanetše go bona se sengwe. Gomme ge a se bona, gona o kgodišegile. Gomme go bona ngakamoloi wa gagwe a tsoga gomme a e hlohla, gomme a bona Moya wo Mokgethwa tlase ga yona thwi fao. Ya. Gona seo—seo se a e bontšha, yo e lego Modimo, gomme gona seo se a e rumu.

Gomme ke thabile kudu go kopana le Ngwanešu Harrel! Ke be . . . Re be re bolela ka badudibasetlogo ba Afrika. O be a bolela ka go thekga ka mašeleng yo mongwe wa ba Ngwanešu T. L. Osborn.

⁶ Bontši bja lena le tseba Ngwanešu Osborn, ke a thanka. Oo, go na le mohlanka yo bohlokwa wa Kriste, Ngwanešu Osborn. Ke yo mongwe wa bagwera ba ka ba hlogo ya kgomo. Ka kgonthe ke na le tlhomphokgolo ya go teba ka pelong ya ka bakeng sa Ngwanešu Osborn, moromiwa yo mogolo bjalo. Go...Ke a dumela o dirile bontši ka mašemong a boromiwa go feta e ka ba mang mo lefaseng lehono, yoo ke tsebago ka yena, ke—ke Ngwanešu Osborn. Yo mobose kudu, mošemane yo mokaone, gomme ka kgonthe ke rata Ngwanešu le Kgaetšedi Osborn.

⁷ Ba mpotša gore Mama Arganbright o ka kopanong bošegong bjo. A o nkutametše, Mama Arganbright? Ka nnete ke leboga kenywa ya gago ye kaone. Gomme ga go makatše ke mohumagadi yo monnyane yo mokaone kudu, o tšwa go karolo ye ya naga mo. Ka mehla o bolela ka Grass Valley. Ke ba bakae ba tsebago Mna. le Mdi. Arganbright, tikologong ya Grass Valley? Gabotse, seo se kaone. O go kae, Mama Arganbright? Ga se ka go bona botelele bjalo, o ngwegile...Šole yena. Ee. Šegofatša pelo ya gagwe. Legae la gagwe ke legae la ka la bobedi, mosadi wa go makatše thwi mo go tšwa Grass Valley. Gomme ka mehla o bile le morwalo bakeng sa batho ba. Gomme Mme Arganbright, ge bjo e le bošego bja gago bja mathomo mo, ke be ke le ntle ka dikgweng ke rapela lehono ge o be o etela mosadimogatša le bona. Gomme ke maswabi gore ke be ke se ka gare go hwetša go le bona, le go kopana le mogwera wa gago.

⁸ Eupša ke tla bolela gore ke bone se sengwe se direga magareng ga batho ba lena mo ye ke sego ka e bona ka toropongkgolo ye e itšego ya Amerika kae kapa kae. Ke bone Bakriste ba lemoga gore ba phošong, go Lentšu la Modimo, le go ema le go kgopela kgaogelo. Ya. Seo se kwagala go nna boka tsošeletšo e ka tsupologa fa. Go tla makatše. Bontši bjo ke rerilego go dikologa lefase, gomme gagolo ka Amerika, ga se ka ke ka bona pele, dihlopha tša Bakriste, ge Lentšu le tlišitšwe fase, go laetša Lentšu, ba phagametše godimo gomme ba rile (hlatseditše) ba be ba le phošo. E sego feela seo, eupša badiredi le bona. Bjale, seo ke tlhokofalo. Ke rata seo.

⁹ Kgaetšedi Arganbright, ka gore ba go dirile o emelele, ke ya go leša mosadimogatša wa ka dihlong. Ke motho yo a lege boi kudukudu ka lefaseng. Eupša o dutše mo bošegong bjo. Hani, ke a dumela o tla ba ebile le nna bakeng sa se, eupša ke ya go kgopela mosadimogatša wa ka go ema. Mosadi yo mobosebose kudu lefaseng lohle, go nna. [Phuthego e opa magoswi—Mor.]

¹⁰ Mosetsana wa ka, morwedi wa ka, morwedi wa ka yo mogologolo, Rebekah. Bjale, hani, ke a tseba o tšhumilwe ke letšatši, eupša ke nyaka o eme, go le bjalo. Go lokile, Rebekah. Yoo ke morwedi wa ka, Rebekah. [Phuthego e opa magoswi—Mor.] Ke a go leboga. Ke a go leboga.

¹¹ Ngwanešu Jewel Rose, ke ba bakae ba mo tsebago? Bošego bjo bongwe o bile le mosadimogatša wa ka go tla sefaleng moo ke bego ke le, morago ga ge go šetše go thomile. O nyakile a idibala. O no mo ngwegela mogohle a kgonago go mmona. O tšwela ka ntle ga tsela ya gagwe, ka gore o boifa gore o ya go mmiletša sefaleng gape.

¹² Ke mmoditše, “Bošego bjo bongwe ke ya go go dira o emelele le go re bolelela nakwana ye nnyane.”

¹³ O rile, “Hwetša kgamelo ya meetse e le komana, gobane ke ya go idibala.”

¹⁴ Ke motho yo a rategago kudu, mosadimogatša wa ka. Ge go na le moputso wo o itségo go fiwa go lapa la Branham, a nke o ye go yena. Ke yena yoo a emego magareng ga ka le setšhaba. Gomme dilo tšohle tše di dirilwego gabotse, o e dirile.

¹⁵ Ke a holofela lesogana le lengwe le le lengwe fa, ge le nyala, le tla hwetša mosadimogatša, gomme o tla phela ka go thaba mmogo bjalo ka ge mosadimogatša le nna re na le mengwaga ye ye masomepedi pedi yeo re nyetšego.

¹⁶ “Yo a hweditše mosadimogatša, o hweditše selo se sebotse.” Bjalo ka ge Salomo a rile, “Mosadi wa go loka ke sealā se bohlokwa mo mphaphahlogong wa monna. Wa go se loke ke meetse mading a gagwe.” Gomme moela wa madi a gagwe ke bophelo bja gagwe. Kafao, wa go se loke ke selo se sempempe a ka kgonago go se swara. Gomme wa go loka ke selo se sekaoñekaone kudu a ka kgonago go se swara, ka ntle ga phološo. Ge Modimo a ka be a file monna selo se sekaoñana go phala mosadimogatša, A ka be a mo file sona, gobane Modimo o no fa bana ba Gagwe dilo tše botse. Gomme O mo file mosadimogatša, gomme ke leboga kudu ka yona.

¹⁷ Gomme go bona basadi, ge ke le mohuta wa go sega bošego bjo bongwe, ka Lengwalo ka tsela ye basadi ba ba Pentecostal ba aparago, ba apere moriri wa bona, le go ya. O re, “Seo ga se dire phapano ye e itségo.” Ka nnete se a dira!

¹⁸ Ke nyaka go le botšiša se sengwe. Ngwanešu Harrel o fa, moromiwa.

¹⁹ Ka Durban, Afrika Borwa, go be go le basadi ba dutše fale ba ponoka bjalo ka ge ba be ba etla ka lefaseng; ba se ne le moroko o tee wa diaparo, feela wo monnyane, e ka ba wa bone-, mphaphahlogo wa diintshi tše tshela pele ga bona. Gomme ba eme fale feela go ponoka bjalo ka ge ba be ba le, le go ema mo mobung ka morago ga mohlolo wo mogolo wo wa mohlolo o diregilego mo sefaleng. Gomme go be go le ka go sehlopha sela, go be go nyakile go ba boMohammedan ba dikete tše lesome (ka nako e tee) ba amogetše Kriste ka kopanong yela ya go swana. Gomme ka gona ka kua ge... Basadi ba, ba eme le banna ba, ba amogetše Kriste.

²⁰ Gomme Ngwanešu Bosworth a re, “Ngwanešu Branham, ke a dumela o swanetše go dira pitšo yela gape. Ke a dumela ba be ba era ya ‘mmele’ phodišo.”

²¹ Ke rile, nnete, bahlatholli ba lesometlhano ba go fapan. Le a tseba, go tsea... O swanetše go ngwala fase se o se boletšego, nako ye ba... O re, “Jesu Kriste, Morwa wa Modimo, o tlile go phološa badiradibe.” Gomme yo o tla ya “pla, pla, pla, pla,” gomme yo motee yo “nik, nik, nik, nik,” yeo ke “Jesu Kriste, Morwa wa Modimo.”

²² Le a tseba, ke—ke be ke tlwaetše go kwa batho ba bolela ka maleme, gomme ka gopola, “Nna, seo se ka se kgone go ba gabotse.” Eupša Beibele e rile, “Ga go modumo ntle le tlhalošo.” Ga se gona. Ge ke kwele seo, ba bangwe ba bona ba kekeretše go swana le dinonyana, ba bangwe ba tswinya bjalo ka dikhunkhwane, le se sengwe le se sengwe. Eupša go ra tlhalošo go bona, ge modumo wo mongwe le wo mongwe o be o le tlhaloso.

²³ Gomme ge e ile go kgabola gape, gomme ke rile, “Gabotse, gona a nke bao bjale bao ka kgonthe ba tsebago gore ga se ya ‘mmele’ phodišo, ke go amogela Kriste bjalo ka Mophološi, Legodimo go ya go lona, le dumela go Morwa wa Modimo, le Mo amogela bjalo ka Mophološi wa lena wa sebele, thubelang medingwana ya lena fase!” Gomme ba e lahletše fase. Gomme ke rile, “Thwi fao bjale, phagamišetša diatla tša gago godimo go Modimo yola, gomme Mo fe tumišo. O tla go fa Moya wo Mokgethwa!”

²⁴ Gomme ge ke eme lebaleng lela, ke bone basadi ba ba bego ba ponoka; gomme ka pela ge Kriste a ba rathile, ba sepetše go tloga mobung woo ka diatla tša bona di phuthilwe. Gomme ge le ba bone gape, ba be ba apere diaparo.

²⁵ Bjale, ge Kriste a ka dira mohetene (a ponokago) go lemoga gore o phošo, go ponoka, gomme ka gona basadi ba ba ipolelago go ba Bakriste gomme ngwaga wo mongwe le wo mongwe ba hlobola go feta, ga ke kgone go e kwešisa. Go na le se sengwe sa phošo felotsoko.

²⁶ Mohetene yo motala, a nno ema fale, a tswalwa ka lefaseng le gomme ga se a tsoge a tseba o be a hlobotše, ga a tsebe o hlobotše. Eupša a nke Kriste a tle ka bogoneng bja gagwe, o a lemoga gore o a ponoka, bontši ge a leka go ikhupetša yenamong bontši ka mo a kgonago, go phutha matsogo a gagwe le go sepela. Matšatši a mabedi goba a mararo moragwana, o tla mo hwetša gape, a apere.

²⁷ Bjale go na le se sengwe sa phošo felotsoko, gomme ke na le nnete ga se le Kriste. Oo, ke a nagana Lentšu le phethagetše!

²⁸ Ke no rata leeto la Abraham. A ga le? [Phuthego e re, “Amene.”—Mor.] Ke dula le yona nako ye telele, ke a holofela

ke tla go *Jehofa-Jireh* bošegong bjo. Ke tšere sehlogo, mašego a mararo goba a mane a go feta, gomme ga se nke ka tla go sona.

²⁹ Eupša ngwaga wo mongwe ka gae ke tšere sehlogo, go rera ka Jobo. Gabotse, e ka ba e nyakile go ba ngwaga ke be ke le ka go Puku ya Jobo, Lamorena le lengwe le le lengwe le Laboraro, go Jobo. Gomme mafelelong ke mo hweditše go fihla a dutše sethobolong sa molora. Ke bile le yena fale e ka ba dibeke tše tharo goba tše nne. Gomme kgaetšedi yo mongwe—yo mongwe yo bohlokwa ka sebete sa go lekanelo go nngwalela, o rile, “Ngwanešu Branham, ke neng o ya go go tsoge wa tloša Jobo sethobolong sa molora?”

³⁰ Gabotse, ke a thanka le makala ke neng ke yago go tsoge ka tliša Abraham go bona *Jehofa-Jireh*.

³¹ Eupša ke bile le ntlha. Abraham . . . Goba, Jobo a dutše fale godimo ga sethobolo sa molora, Elihu a bolela: Modimo a leka mokgethwa. Ke e tlišitše yohle ka gare, go fihla ke fihla lefelong moo nka kgonago go dira kolo ya go bolaya, go bea se sengwe le se sengwe komana. Ka gona Morena o tlide fase ka go sesasedi se, gomme magadima a thoma go gadima, gomme medumo ya rora. Gomme Moya wa Modimo o tlide godimo ga mopropfeta, o dutše godimo ga maoto a gagwe, o rile, “Ke a tseba Molopolodi wa ka o a phela;” šetšang “Molopolodi.” “Gomme ka matšatšing a mafelelo O tla ema godimo ga lefase. Gomme le ge diboko tša letlalo di ka senya mmele wo, efela ka nameng ya ka ke tla bona Modimo; Yo ke tla mmonago nnamong, mahlo a ka a tla bona, gomme e sego yo mongwe.” Oo, a thuto fao! Go kokotela seo ka gare, go tšere lebakana go dira batho bohle ba be lefelong, Moya feela gabotse, morago go o kokotela. Gomme morago aletara e be e beilwe mothalong le go tlatšwa ka batho, ba sokologa.

³² Feel a ge o hlahlwa ke Moya, e no tšeа nako ya gago go fihla o korotše. Ga o, o tla thunya godimo kudu goba go thunya bophara kudu, goba se sengwe. A re e koroleng, Beibele! Ke a dumela gore Modimo o re nyaka re korotše. Moya wo Mokgethwa o korotše le baapostola, goba ba korotše ka Moya wo Mokgethwa, a ke re. Gomme ke a dumela re ka dira selo sa go swana, ka Lentšu la go swana. Le bethile senepša! Gomme ge le se bethile nako ye nngwe, bogare bja go hwa, le ka kgona go se betha gape! Eupša o swanetše go korola! Eba le nnete go hema ga gago, go goga ga gago, se sengwe le se sengwe se no loka. Ke thunya dinepša; ke tseba se e lego, go dula ka go phenkišano, le raborolo ye e tla korolago.

³³ Nako ye nngwe ke rometše mohuta wo monnyane wa masomešupa tlhano morago go Khamphane ya Winchester, letšatši le lengwe. Gomme ga se ke kgone go e dira e bethe godimo e ka ba tše tharo . . . goba kotara ya intšhi, go dijarata tše masometlhano. Gomme Khamphane ya Winchester e e rometše morago go nna, e rile, “Moruti Branham, sethunya sela se dirilwe

feela go—go kgoboketša sehlopha sa dikolo tše tlhano, intšhi ka dijarata tše masomepedi tlhano.” Bjale yeo e bile khamphane yeo se e dirilego. Ke tseba go fapania. Ke nno lokela, mo mothalong, ka tlhokomelo, tše senyane thwi, ditheke tša khapete, go dijarata tše masometlhano, ka sona. Kafao ke tsebile se be se korotše. Kafao ke ile ka no tšwelapele go ferehlana le sona, le go ferehlana le sona, go fihla ke se dirile se otlelle morago gape.

³⁴ Bjale, selo sa go swana ke ka Lentšu la Modimo. Dilo tšela baapostola ba di dirilego, dilo tšela tše Kriste a di tshepišitšego, re swanetše go korola ka Lentšu, ka Moya. Ge le e dirile nako ye nngwe, le tla e dira gape, gobane Ke Modimo. Gomme Modimo ke Lentšu, gomme A ka se kgone go palelwa.

³⁵ Ge se se itšego sa go tšhoša, sethunya se ka ba go hlepha gannyane kudu ka tsela ye ka letsogong la pele, go hlepha gannyane goba go swinelela kudu, eng kapa eng ye e se tlemago, o ka kgona go bea boima bja monwana wa gago godimo ga raborolo, gomme (sona se thunya go phethagala) boima bja monwana wa gago bo tla se rifula. O swanetše go ba le se sengwe le se sengwe go phethagala.

³⁶ Ke ka tsela yeo o swanetše go dira ka Bokristeng, go dira Lentšu, go le dira le bonagatše le go dira gabotse, wenamong le Lentšu le Modimo, le swanetše go phethagala, gomme ka gona le tla korola. Le swanetše go ba! Kafao kagona, go rereng, o swanetše go ikwela Moya feela gabotse, morago o korole; e tla ya kgole, e tla otlela go ya go senepša.

³⁷ Ka gona batho ba ba dutšego tikologong, makga a mantši batho ba re, “Ngwanešu Branham, ga ke kwe ka dikopano tša gago.”

³⁸ Ga ke na le ditsejana tša go ya ka ntle bjalo ka ge banešu ba bangwe ba dira. Ba na le dikgatišobaka, ba na le—ba na le seyalemoya, thelebišene. Ke no ya go kgabola le go leka go emela Morena Jesu. Batho ba a e bona, ba a e dumela, ba a fola. Modimo o a e tseba, seo ke sohle se lego bohlokwa. Le a bona? Ga re, ga re... Ga go ye go ba histori e ngwadilwego. Le se tshwenyege ka seo. Ga go ye go ba nako bakeng sa go ngwalwa ga histori. Ke a dumela Jesu o etla. Seo, ke a se dumela. Gomme ke nyaka go phela lehono bjalo ka ge o ka re O tla tla lehono goba gosasa. E sego dikolo tše kgolo bogolo, le go ya pele. Re direlang dilo tše, gomme morago ra rera Jesu o etla? Göbaneng, mediro ya rena beng e paka kgahlanong le rena. Yeo ke nnete. Jesu o etla, a re beng, re dire kereke komana bakeng sa yona! A re beng komana. Oo, ke Mo rata bjang!

³⁹ A re inamišeng dihlogo tša rena bjale bakeng sa lentšu la thapelo. Oo, ke rata bjang go bona batho ge ka tlhomphokgolo ba inamiša dihlogo tša bona. Bjale a re nong go dula re homotše gannyane ga nthatana, gomme re ithute. Bjale re nyaka go tše nako ya rena. Gosasa ke Lamorena, sabatha, letšatši la

sabatha la Bokriste. Gomme ga ke le nyake thari ka go sekolo sa Lamorena, le ge re sa nyake go itlhaganela ka dilo tše.

⁴⁰ Naganang bjale, “Morena, a tlhogeloa ya ka ka pelong ya ka bosegong bjo ke go ya ka thato ya Gago?” Ge e le yona, gona o nagana ka yona. Ka gona ge o nagana ka yona, tlhogeloa ya gago, gomme o e hlahlobe ka lenaneo la Modimo. Ge e bonala go no loka le lenaneo la Modimo, gona ke nyaka o phagamišetše seatla sa gago go Modimo, le go re, “Modimo, nkgopole, se ke se ke se hlokago.” E no nagana thata ka kgonthe. Modimo a go šegofatše. Gabotse. Morena a le šegofatše. Yeo e lokile. Nno tšwelangpele go beeng seatla sa lena godimo. O bona bohole. O tseba dilo tšohle. Seo ke se sebotse. Modimo a le šegofatše. Amene. Morena a le šegofatše. Seo ke se sebotse. Nno tšwelangpele go nagana, go beeng seatla sa lena godimo. Bjale ke šeditše seatla se sengwe le se sengwe ge se rotoga. Go lokile. Seo se lokile.

⁴¹ Tate wa Legodimong, bjale re a tla, re batamela gape ka go Leina lela la go lekanelo moka la Morena Jesu, godimo go ya Teroneng ya Kgaogelo. Bjalo ka ge moreti a rile, “A nke nna mo Teroneng ya Kgaogelo, ke hwetše tokologo ye bose.” Gomme, Modimo, dipelo tša bona di imetšwe bakeng sa se sengwe. Gomme a nke bona bjale, mo Teroneng ya Kgaogelo, ba hwetše kimollo yeo Modimo a e lokollelago go bona, Matwetwe yo mogolo, le tumelo bakeng sa se ba se hlokago.

⁴² Ke na le bobedi diatla tša ka godimo. Ke na le tlhoko. Nkgopole, Morena.

⁴³ Gopola batho ba bohole mo bao disakatuku tše di ba emelago. Oo, ka fao mabopaki a tliego ka gare ka baka la dilo tše. Tlhomphokgolo. Tsela ntle go kgabaganya dithaba tše tša lešabašaba mo, felotsoko, bomme ba go babja, botate, masea a mannyane, batho ka sepetele, papa wa kgale wa sefou a dutše morago ka kamoreng ye nnyane ka lehlotlo le lešweu ka seatleng sa gagwe, ba letile go bowa ga disakatuku tše. Modimo, eba le kgaogelo. Efa, Morena, gore mang le mang di bewago godimo ga gagwe, a nke lenaba le lahlegelwe ke maatla le maatla a gagwe, a nke ba ye gomme ba fole. E tee še e ngwadilwe go kgabaganya mo, “kankere.” A nke diabolo yola a ba tlogele, Morena. A nke Moya wo Mokgethwa, bjalo ka ge Modimo a lebelela fase ka Madi a Morwa wa Gagwe Mong yo a hwetšeego morero wo, a nke poelano ye kgolo e be go lekanelo bosegong bjo, gomme tumelo e elela godimo ga bona ka bottlalo, gomme a nke . . . goba ka bottlalo, gore ba ke ba amogeles phodišo ya bona. E fe, Morena.

⁴⁴ Šegofatše Lentšu la Gago bjale. Thuša mohlanka wa Gago, re tlotše bakeng sa tirelo. Tlotša pelo ye nngwe le ye nngwe yeo e kwago. Gomme re ya go no bolela bjale, Tate. O re botša se re ka se bolelago, le go re botša re dire eng. Re Go letetše go ba le rena ka kopanong.

⁴⁵ Ke a Go leboga bakeng sa dipina tše kaone bošegong bjo, dipina tšela tše dibotse. Lesogana le morago mo, Ngwanešu Heimer, o sa tšwa go opela pina yela ya go makatša, *Mogalelia*. A nke Mosetsebje yola wa Galelia a sepele ka gare bjale bošegong bjo. A nke re kwe segalontšu sa Gagwe se re go monagano wa go tshwenyega, boka A dirile meetse a go tshwenyega, “Khutšo, homola.” Gomme a nke pelo ye nngwe le ye nngwe e tshwegilego e fole. Re e kgopela ka Leina la Jesu. Amene.

*Gomme o biditše leina la le lefelo Jehofa-jireh: bjalo ka
ge go ngwadilwe, Ka thabeng ya MORENA go tla bonwa.*

⁴⁶ Bjale re nyaka go thoma ka moanegwa yo mogolo yo. Gomme gosasa . . . Bjale, Morena ge a rata, re ya go leka go fihla bofelong ka ga Abraham bošegong bjo. Gomme gosasa, mohlomongwe sehlogo go phodišo Kgethwa.

⁴⁷ Morena o bile go loka go rena fa. Re bile go kweng mabopaki a se dilo tše di diregilego. Gomme re thakgetše kudu! Gomme re bile le bošego bjo bongwe, mothalo wa thapelo wa go felela, goba re ba biditše. Gomme fao go be go se wa go fokola yo re bego re mmona ka moagong, setulo sa bagolofadi, kae kapa kae, eupša yo a bego a le godimo, a sepele go dikologa, a eya.

⁴⁸ Gomme bjale bošego bjo bongwe le bjo bongwe Moya wo Mokgethwa o tlie ka gare ka go bja Gagwe bjo bohlokwa, Bogona bja kgethego, gomme o ile ntle go kgabola batheeletši, a ipega Yenamong, gore O fa. Gona, re swanetše go Mo dumela. Le a bona, O nyaka le Mo dumele. Tlhompho ya godimodimo ye o ka kgonago go efā Modimo ke go Mo dumela. O swanetše go dumela. “Yo a tlago go Modimo o swanetše go dumela gore O gona.” Gomme bjale Mo dumele!

⁴⁹ Gomme bjalo ka ge ke tšea Abraham, leeto, e no ba ka gobane ke leka go aga tumelo bakeng sa sehloa se segolo, go dira batho ba bone ke bona bomang.

⁵⁰ Bjoo ke bothata. Ke hwetša dihlopha tše pedi tša batho, ge ke sepela. Yo motee wa bona ke mopentecostal, yo mongwe ke wa motheo. Bjale, ba motheo ka maemo ba tseba mo ba lego, se ba lego sona, eupša ga ba na le tumelo ye e itšego le yona. Pentecostal ba ne tumelo, eupša ga ba tsebe ka bona bomang. Bjale, go no swana le monna yo a nago le tšelete ka pankeng, eupša ga a tsebe mokgwa wa go ngwala tšelete; gomme yo mongwe o kgonago go ngwala tšelete, gomme ga a na le tšelete ka pankeng. Ge o ka no tsoge wa ba tliša mmogo, se sengwe se tla direga. O ka tsoge wa hwetša tumelo ya pentecostal le thuto ya motheo, ge o ka tsoge . . . goba e ka ba go hwetša thuto ya motheo le tumelo ya pentecostal, se sengwe se ya go direga. Yeo ke nnete.

⁵¹ Bjale, ke rata bjang go fa bopaki fa, ge ke bone, sekolo sa Lutheran, makgolo a mane ba amogela Kolobetšo ya Moya wo Mokgethwa mola ke bolela le bona godimo ga yona. Oo, nna, e

be e le ponagalo ya letago, go ba dira ba tsebe seo. Ga se bona, gobane ke bona Malutheran, ga se ba balelwā ntle.

⁵² Ga go selo kgahlanong le Molutheran, Mobaptist, Momethodist, e ka ba eng o lego, Mokatoliki. Ga ke kgahlanong le dilo tseo. Ga ke kgahlanong le batho bao. Ke tshepedišo ye e ba swerego, ke se ke bolelago kgahlanong le sona. Ga go selo kgahlanong le motho ka motho, bohole ke batho ba Kriste a ba hwetšego; Mokatoliki, Mojuda, e ka ba eng a ka bago. Ke tshepedišo. Boka Mohammedan, Masikh, Majain, goba e ka ba eng e ka bago, ke tshepedišo. Buddha ke tshepedišo, le a bona. E sego batho bao—bao ba rapelago Buddha; ke tshepedišo yeo e ba gogago.

⁵³ Seo ke selo sa go swana. Jesu o be a se kgahlanong le batho. O ba hwetše. Eupša ditshepedišo tseo di bego di Mo thibetše, go ba tloša go Yena. Seo ke selo bjale.

⁵⁴ Bjale ke naganne, go tšeeng Abraham, go tsebeng gore e be e le go Abraham tshepišo e filwe, le Peu ya Abraham ka morago ga gagwe. Bjale a re yeng leeto morago gannyane nthatana gomme re hwetše bokamorago, gomme re tle bosegong bjo go otlologa go sehlogo bjale bakeng sa nakwana ye nnyane.

⁵⁵ Gomme dikarata tša thapelo di tla fiwa go e ka ba mang yoo a nyakago go rapelelwa. Gomme rena, ge o sa di hwetše tshole bosegong bjo, re tla di hwetša gosasa. Gomme yo mongwe le yo mongwe yo a nyakago go rapelelwa o swanetše go ba le karata ya thapelo. Gomme eba mo ka seripagare sa pele gosasa, go topa karata ya gago ya thapelo, gobane re nyaka go thoma kopano nako yeo. Gomme re tla rapelela motho yo mongwe le yo mongwe yoo a swerego karata ya thapelo gosasa. Re be re leka, go kgabola mašego, go hwetša bao ba se nago dikarata tša thapelo, gore bao ba nago le dikarata tša thapelo ba tla ba le monyetla wa go ba ka mothalong wa thapelo. Gomme ba bangwe ba biditšwe ntle fale, ntle le dikarata tša thapelo. Seo se hwetša bobedi, mahlakore a mabedi. Karata ya thapelo ga e re selo. Eupša o fa motho karata ya thapelo, go ne e ka ba diphesente tše masomenne di fodilego thwi nako yeo, ke le nagana o tla go kgabola mothalo; se sengwe a ka kgonago go se swara, se sengwe a ka kgonago go se lebelela, goba se sengwe. Gomme mo—mo mošemane o tla be a efa dikarata tša thapelo gosasa ka seripagare sa tee, gore ba kgone go tloga ka iri ya bobedi, gore bobjohle bja me—me mediro ya letšatši ba e hwetšago.

⁵⁶ Gomme lena ba le nyakago seswantšho, puku, goba theipi, di swanetše go hwetšwa bosegong bjo. Ga go go rekiša ka Lamorena; ga re tsoge ra dumelela seo, go di rekiša. Re hlompha Lamorena, ga re rekiše le gatee ka Lamorena. Gomme dipuku tše le dilo, ga se tšona selo go nna, ke dipuku tseo batho ba ngwadilego ka bodiredi bja ka. Diswantšho tše American Photographer Association e tšere seswantšho, gomme ke sa

Douglas Studio, se ne tokelo ya kopollo. Puku ke ya Ngwanešu Gordon Lindsay le Morapeledi Julius Stadsklev. Re a di reka le go di tliša kopanong, le go di rekiša go nyakile go se re di hwetšago bakeng sa tšona, le go loba go tšona. Gomme ka mehla re boletše se, ge e ka ba mang . . . ke boditše batho bao ba rekišago dipuku, "Ge monna goba mosadi a etla godimo kua, motho wa go šokiša, a se ne tšelete go reka puku yela; ba fe yona, go le bjalo. Gomme re tla . . . Ke tla bona gore e a hlokamelwa." Gomme ge o na le puku gomme ga ya swanela se e swanetšego go ba sona, e tliše morago. Go ka se tsoge gwa ba le yo motee a bušago go lefeela eupša go neela tšelete ya gago morago, le a bona. E no ba se sengwe go thuša tumelo ya gago. Seo ke sohle re lekago go se direla, goba re ka se se dumelele go ba mo. Yeo ke nnete tlwa. Kafao bjale bošegong bjo, elelwang, ba tla be ba le go borekišetšopuku. Mogwera wa go loka wa ka, Mna. le Mdi. Wood. Ke duma ge nkabe ke na le nako go le botša bopaki bja bona, ka fao morwa wa bona a fodišitšwego go polio. Le dilo tše dingwe tše ntši di—di diregile, tša batho ba ba lego mo ka kopanong.

⁵⁷ Bjale a re direng bokamorago bja Abraham. Sa pele, Modimo o kopane le Abraham, ntle le mabaka, kgwerano ye A e dirilego le Abraham. E sego e ka ba eng le gannyane; Abraham ga se a be le selo go dira eupša go dumela Modimo. Kgwerano e be e le ka mogau ka go felela, le ntle le mabaka. E sego "ge o rata." Modimo o rile, "Ke na le!" Gomme bjale motho yo mongwe le yo mongwe . . .

⁵⁸ Elelwang, Peu yohle ya Abraham ye e kilego ya tla go Modimo, e tla ka tsela ya go swana. Ga go selo o ka kgonago go se dira! O ka se kgone go iphološa wenamong go feta o ka kgona go tšea marala a putsu le go tabogela mošola wa ngwedi. O ka se kgone go iphološa wenamong. Ga go motho a kilego a nyaka Modimo; ke Modimo a nyakago motho. "Ga se la tsoge a Nkgetha," go boletše Jesu, "Ke le kgethile."

⁵⁹ Sa pele, bjale, o ka kgona go ya ntle mo le go botša kolobe gore o phošo, o ja dikošo? O tla go botša go šetša ditaba tša gago mong. Eupša go tla swanela go tšea se sengwe seo se ka fetolago tlhago ya gagwe, go mo dira a lemoge gore o phošo. Se sengwe se swanetše go direga go kolobe, pele.

⁶⁰ Ke ka lebaka leo ba ba bitšwago Bakriste makga a mantši ba pshikologa ka lerageng, morago sebeng, ke ka gobane . . . O ka kgona go hlatswa kolobe, le go penta dinala tša menwana ya tšona, wa e tlotša manekhure wa dipounama. Yeo, yeo ke phošo, e ka ba eng e lego. Ditlotša dipounama, a ga se wona, goba se sengwe? Ke hwetša seo, dilo tše ka moka, di hlakahlakane. Le tseba se e lego sona, go le bjalo. O tlotša kolobetshadi ya kgale ka ditlotša dipounama gomme—gomme, le a tseba, o dira mediro ye mengwe yohle go yona, gomme o tla ya go leraga thwi go otloga, le go pshikologa gape. Gobaneng? Ke kolobe, le go thoma. Tsela

e nnoši o ka tsogego wa mo dira go fapano go itšego, ke go fetola tlhago ya gagwe.

⁶¹ Yeo ke tsela e nnoši yeo monna goba mosadi a ka tsogego a kgona go bapela le Modimo, ke go fetola tlhago, go hlweka, go hwa go sebe sa motho wa kgale, le go tswalwagape gape ka Moya wa Modimo. Gomme, seo ke, Kriste ke Moya wa Modimo, gomme Kriste ke Lentšu. Gona e hlatsela le Lentšu. Yeo ke tsela e nnoši ba tla tsogego ba e dira.

⁶² Bjale, Abraham o be a lebeletše Toropokgolo Yeo Moagi le Modiri wa yona e lego Modimo. Gomme lehono re baeti, basetsebje, re lebeletše Toropokgolo ye Moagi le Modiri e lego Modimo. Lebelelang! Abraham, pele a ka tsoge a tseba, go be go le se sengwe boka sekwitlhahlo ka go yena, gore o lebeletše Toropokgolo.

⁶³ Lehono, ke feta tlase le mosadimogatša, ke be ke re, “Lefelo le lennyane la go ratega mo le dutše godimo ga thaba, mohlomongwe mengwaga ye makgolotharo ya go feta; sethogwa se botse, dithimba tše kgolo tša godimo. Monna o tlie ka gare, ba di ripetše fase, go tšhilafatša meela. E tla ba lefelo le lebotse go phela mo.” Ya, eupša le a lebelela, o agile mengwako. Morago ba thoma go ata. Sebe le dikgaruru di thoma go tsena. Hollywood e sepeletše kgauswi le yena, e e tlišitše ka gare ka mobi, ka thelebišene. Ka... Gomme bjale ke ya go tšhilafatšwa, ya go tlala sebe, toropokgolo ye nngwe le ye nngwe!

⁶⁴ Gomme ka kgonthe, bjalo ka batho, se sengwe ka go bona se rata go phela mmogo, go moagišani, le go ba moloki. Ka kgonthe go na le Toropokgolo felotsoko! Botebo bo bitša Botebo gape!

⁶⁵ Gomme Abraham o bone ditoropokgolo tša letšatši la gagwe, Uri ya Kaladea. Gomme o tsebile gore ka gobane go be go le se sengwe ka go yena se bitša, go be go le Toropokgolo ye e bego e fapano, ye Moagi le Modiri wa yona e bego e le Modimo. Gomme Modimo o bone seo ka go Abraham, o mmoditše, “Ikaroganye wenamong bjale, tšwela ntle.”

⁶⁶ Bjale, Abraham, selo se tee ke nyakago le se hlokomele, o obametše Lentšu la Modimo go leletere.

⁶⁷ Ka mehla elelwang seo! Woo ke Molaetša wa ka. O swanetše go obamela Lentšu. Gomme go tsebeng e ka ba eng kgahlanong le Lona, se tlogele se nnoši. Se ka no lebega gabotse, eupša se fe mabaka kgahlanong le Lentšu la Modimo.

⁶⁸ Seo ke selo sa pele Sathane a se dirilego, e bile go fa mabaka kgahlanong le Lentšu la Modimo, go Efa. Gomme ga se a tsoge a Le belaela. O nno fa mabaka. Sathane o Le file mabaka.

⁶⁹ Gomme yeo ke tsela ye ba dirago lehono. “A ga go hlake gore re swanetše go dira se? A ga go hlake?” Ge se le kgahlanong le Lentšu la Modimo, se tlogele se nnoši! Ke segalontšu sa Sathane.

⁷⁰ A nke Lentšu, ge Lentšu le le ka go lena . . . “Ge le dula ka go Nna, gomme Lentšu la Ka ka go lena, gona kgopelang se le se ratago.” Moya wo Mokgethwa! “Le dula ka go Nna, Lentšu la Ka ka go lena,” leo ke Lentšu le dirilwe nama, “kgopelang se le se ratago gomme se tla dirwa.” Yeo ke tsela. Tlošang dithutotumelo tšohle, dilo tšohle kgole, gomme le swarelele go Lentšu gobane ke Kriste. Hlokamelang, gona le tla iponagatša lonamong.

⁷¹ Yo mongwe o rile, “Ngwanešu Branham, o tseba bjang dilo tše. Bjang?”

⁷² Tše tše le di bonago mo ka kopanong ke dilo tša magogorwane. Yo mongwe le yo mongwe yo a sepelago le dikopano mo, o a tseba. Moya wo Mokgethwa o utolla dilo tše di tlago dibeke le dikgwedi gare ga nako. Gomme botšia e ka ba mang, “A e kile ya palelwa nako ye nngwe?” E ka se kgone go palelwa, le a bona. “O e tseba bjang?” Ka gore ke tshepišo ya Lentšu, gomme iri e mo. E swanetše go tla go phethega. Bjale, ga ke tsebe, go na le di se kae, bonnyane bo tla e dumelago, eupša e swanetše go ya pele go no swana. Gomme a le kile la ela hloko, e ya thwi bokagodimo ga hlogo ya batho, gomme e fetile gomme e dirwa pele ba e lemoga. Ka mehla ka tsela yeo.

⁷³ Go lena batho ba Katoliki, le tseba se kereke ya lena e se dirilego? Gobane Joan wa Arc o be a le mo—mo mokgethwa wa kgontha wa Modimo, o dirile mehlolo ya Modimo, o profetile ka Modimo. Gomme le mmiditše moloi, gomme la mo tšuma koteng; gomme yena a goelela bakeng sa kgaogelo, gomme la mo tšuma koteng. Mengwaga ye makgolo moragwana, le lemogile le be le le phošo, morago le mo dirile mokgethwa. O fetile thwi godimo ga lena, gomme ga se le mo tsebe.

Eliya o fetile go kgabola, ba be ba sa mo tsebe. “Moradia wa kgale!”

⁷⁴ Kriste o fetile go kgabola, ba be ba sa Mo tsebe ka morago ga lehu la Gagwe, poloko, le tsogo. Modimo o bea leo. Gomme ka go felela le tlaetša mosedumele. Gomme o bontšitše . . . O rile, “Ke e utile go tloga mahlong a ba bohlale le ba tlhaologanyo, le go e utolla go masea ao a tla ithutago.” Kriste o lebogile Modimo bakeng sa go e dira. Le a bona?

Ikokobetše wenamong. E dumele. Leka Lentšu.

⁷⁵ Jesu o rile, “Phetlang Mangwalo, ka gore ka go wona le nagana gore le na le Bophelo bjo Bosafelego, gomme ke wona a pakago ka Nna. Le swanetše go be le tsebile iri.” O rile, o boditše Bafarisei, “Lena baikaketši, le kgona go hlatha sefahlego sa lefaufau. Eupša maswao a nako, ga le kgone go a hlatha. Ka gore ge nkabe le Ntsebile, nkabe le tsebile letšatši la Ka.” E fetile thwi godimo ga bona, ba be ba sa e tsebe go fihla e be e ile. Elang hloko bjale Lentšu le le bohlokwa kudu!

⁷⁶ Gomme elang se sengwe hloko, ge re sa le godimo ga yona, Loto. Jesu o rile, ka Boyena, “Elelwang mosadimogatša wa Loto.” Ge Lentšu le se bohlokwa kudu, ge go fa mabaka go lokile; ge Morongwa yola a rile go Loto le lapa la gagwe, “Eyang Tsoare, eupša le se ke la lebelela morago!” Gomme mosadimogatša wa Loto, ka selo se sennyane sa go se be bohlokwa gore a retologe le go lebelela morago, eupša e be e le kgahlanong le Lentšu, o ile a fetoga mmoto wa letswai.

⁷⁷ Ka gona le re, “Go botša basadi ka go ripa moriri wa bona, go apara diaparo...?” Modimo o rile le se ke la e dira! Le latela Lentšu. Loto o bile le, ntle le pelaelo, mosadimogatša yo mokaone, eupša ga se a latela Taelo go Lentšu. Loto! Efa o be a le mosadi wa go loka, eupša ga se a latela Taelo go Lentšu; a no fana mabaka gannyane ka lona.

⁷⁸ “A ga e hlake, Ngwanešu Branham, gore re swanetše go dira se? Ke nna modudi wa Amerika, ke—ke na le tokelo go dira eng kapa eng ke nyakago go e dira. Woo ke monyetla wa ka wa Amerika.” Ke monyetla wa gago wa Amerika, eupša e sego monyetla wa gago wa Bokriste. Ka gore, ka Bokriste, ke wena nku; gomme nku e lahlegelwa ke ditokelo tša yona. E a ikhomolela gomme ya go lesa go tšea go yona ditokelo tšohle e nago le tšona. Eupša pudi e tla tsoša ledimo ka yona. Yeo ke nnete. Eupša nku e lahlegelwa ke ditokelo tša yona. Gomme Mokriste ka mehla o loba ditokelo tša bona tša bosetšhaba ge e le kgahlanong le ditokelo tša gago tša Bokriste.

⁷⁹ Mosadi wa Loto o nno lebelela morago, [Ngwanešu Branham o thwantšha monwana wa gagwe—Mor.] yeo e be e le yona! Bjale seo se dirile eng? Se a re botša mo ka go Abraham, le Loto, gore selo se ba se beago pele kua, mohlala. Gomme re ka se kgone go tloga go yona.

⁸⁰ Bahebere, tema ya 11, e rile, “Dilo tše e be e le tša mohlala go rena. Go boneng gore re dikaneditswe gohle ke leru le legolo bjalo la dihlatsa. Re ba go beela thoko sebe se sengwe le se sengwe.” Sebe ke eng? Gosedumele! “Sebe se sengwe le se sengwe, gosedumele go gongwe le go gongwe ga Lentšu la Modimo, seo se re nyamišago gabonolo.”

⁸¹ Re tla kgahlanong le se sengwe, ra re, “Gabotse, ba rera seo, gore seo e be e le...” Le se ke la dira seo! O dira feela se Modimo a rilego se dire. Dula le Lona, go fihla tlhakeng!

O re, “Ga e dire phapano ye e itšego.”

⁸² Go lokile, selo se nnoši nka kgonago go se bolela ke se Lentšu le se bolelago. Gomme Jesu ka go tia o boletše gore, “Elelwang mosadimogatša wa Loto.” O nno lebelela godimo ga legetla la gagwe. Efa o nno ema lebakana. Seo ke sohle a se dirilego. Mosadimogatša wa Loto o nno lebelela morago. Gomme ge... Modimo o fetotše monna yola wa go loka, Loto, mosadimogatša wa gagwe, mmoto wa letswai, ka feela selo se sennyane sa

nthatana, go no se obamele Melao ya Gagwe go lekanelo go no lebelela morago le go bona se mollo ohle o bego o le mabapi le sona, gomme a fetoga mmoto wa letswai, gomme o eme fao le bjale lehono bjalo ka mohlala gore Modimo o ra se A se bolelago.

⁸³ Oo, ge tumelo ya kgonthe e ka kgona go kgwaparetša ka go batho! “Tumelo e tla ka go kwa, go kwa Lentšu la Modimo.”

⁸⁴ Efa o ile a ema lebakanyana. Seo ke sohle a ilego a swanela go se dira. Sathane o ile a mo swara, gomme a no e fa mabaka le yena. “A ga e hlake? Ge Kgaetšedi *Semangmang* a ka kgona go dira seo, a o ka se kgone go se dira, le wena? Ke mosadimogatša wa modiša.” Ga ke tshwenyege gore ke mang, goba ke mang. Ge e le kgahlanong le Lentšu, o se ke wa e theeletsa. Eya thwi pele! Mehlala!

⁸⁵ Yeo ke tsela ye Abraham a dirilego. Ke go fa mabaka mo go kaakang o naganago sa—sa saense ya kalafo e ka be e mo file, ka letšatši leo, gore o be a sa ye go ba le lesea lela? Gomme go reng ka ge a be a le masomešupa tlhano? Morago re mo hwetša ge a be a le lekgolo, o be a sa e dumela go tia kudu go feta a dirile lefelo la pele, o bile le mengwaga ye masomepedi tlhano go tšwelapele a aga tumelo ye ntši go yona. Ke rata seo. Ee, mohlomphegi.

⁸⁶ Ka gona ke nyaka go tliša šedi ya lena go se sengwe gape pele re emelela. A le etše hloko? Ke—ke a holofela le e hweditše. Ka go kgwerano yela e tiišeditšwego, ka go ngwala kgwerano yela le go e kgeila go arogana, a le e hweditše? Phagamišang diatla tša lena ge le dirile, le hweditše se e bego e se ra. Kgwerano e ngwadilwe, ya kgeilwa, Modimo a tsea ponagatšo ya thrinithi, a e dira ka go e tee; go e kgeila go arogana, go tseela mmele godimo Godimo, le go romela morago Moya wo Mokgethwa go phela ka Kerekeng, go tšweletša selo sa go swana seo mmele wola o se tšweletšego, bjalo ka mosadimogatša, Monyalwa; Moya wa go swana, mošomo wa go swana, Thuto ya go swana, se sengwe le se sengwe feela tlwa ka tsela ye A bilego le yona, leswao la go swana, “Jesu Kriste wa go swana maabane, lehono, le go ya go ile.” Hlokamelang!

Fao go ka no ba, mohlomongwe, Mojuda o dutše mo.

⁸⁷ Le a bona, Modimo o dira dilo tše, gomme e ya thwi pele magareng ga batho gomme go le bjalo ga ba e hwetše.

⁸⁸ Boka ke be ke hlaloša ka gobaneng basadi ba šira sefahlego sa bona ge ba nyala. Gobaneng? Ba ka no se kwešiše seo. Eupša se ba se dirago, ke, go tseba gore ke bona mmele, ga ba ne hlogo, monna ke hlogo ya bona. Ke ka lebaka leo Rebeka a itšhirilego yenamong. Gomme ke ka lebaka leo Kereke e swanetšego go itšhira yonamong le go ineela yonamong go Kriste, gobane Yena ke Hlogo, gomme Yena ke Lentšu.

⁸⁹ Bjale, Mojuda, Yom Kippur, ge ba tše selalelo, goba Paseka, yo mongwe le yo mongwe o a tseba, yoo ke Mojuda, gomme o a

tseba gore ka tlase ga sekjurumelo ke seripa se se robegilego sa senkgwa. Gomme ga go Mojuda yo ke tsebago ka yena, yo nkilego ka bolela le yena, a ka kgonago go hlatholla gore ka baka la eng seripa se se robilwego sa senkgwa. Gobaneng, še yona ka go tiišetšo ya kgwerano, mmele wo o robegilego wa Kriste, ge A robile Modimo go tloga go motho; O be a le bobedi Modimo le motho. Gomme ge A tšere Moya godimo... Gomme Jesu o rile, theetšang, "Ka letšatši leo le tla tseba gore Ke ka go Tate, Tate ka go Nna; Nna ka go lena, le lena ka go Nna." Ke Modimo ka go batho ba Gagwe! Modimo wa go swana!

⁹⁰ O be a emetšwe kua, moo re boletšego ka gona bošego bja go feta. Modimo o tlide fase, tlakakgolo M-o-r-e-n-a, Jehofa-Jireh, Jehofarapha, Jehofa-manasseh, Elohim, yo Yena wa go lekanela Moka, Yena wa go Tia, Yena wa Matswele, tšohle dithaetlele tša Gagwe le se sengwe le se sengwe, o bonagaditšwe ka mmeleng wa motho yo a jago dijo tša motho, gomme a timelela pele ga mahlo a bona. Modimo!

⁹¹ Gomme Jesu, ge A etla, O rile, "Bjalo ka ge go bile ka letšatšing lela, go tla ba bjalo." Modimo!

⁹² Seo ke senkgwanthetelego sa ka fase ga seapešo, seripa sa go robega; e sego se ba se tšeago, eupša Se se robilwego. Gobaneng ba sa e kwešiše?

⁹³ Tsela ya go swana ge Jesu a topile di—di dingwalwa gomme a thoma go bala. O badile karolo ya temana, gomme a e tlogela, ka moka ga yona, ka baka la gore e be e no ba ya Gagwe ya letšatši leo. Temana ka moka e amana le go Tla ga Gagwe la Bobedi.

⁹⁴ Ke ka baka leo Bajuda ba sa kwešišego seo, ka gore ba swanetše go foufatšwa. Ga se ba bona Mesia wa bona, gomme efela O be a le gona. Gomme nako ye nngwe le ye nngwe ge ba tšea ya bona—ya bona Paseka, go na le senkgwanthetelego se se robegilego gape, gomme ba sa e tsebe.

Ke botšišitše rabi. O rile, "Re rutilwe go dira seo."

Ke rile, "Gobaneng o e dira?"

O rile, "Ga ke tsebe. Ga go yo mongwe gape a tsebago."

⁹⁵ Le a bona, mosadi o šira sefahlego sa gagwe, efela ga a lemoge. Go na le gore a tle ka gare gomme a dumelele monnamogatša wa gagwe go ba hlogo ya gagwe, ke hlogo ya monnamogatša. Yeo ke phapogo. Bjale woo ke mokgwatebelelo wa Amerika.

⁹⁶ Eupša yeo ke yona, senkgwanthetelego sa go robega. Ka gona gape re ela hloko, gape ke be ke nyaka go lemoga mo, go fa bokamorago bjale pele re etla fase go karolo ya kgonthe ye re nyakago go bolela ka yona bošegong bjo.

⁹⁷ Bošegong bja go feta le elelwa gore ge Abraham, kgwerano e dirilwe le Abraham le Peu ya gagwe ka morago ga gagwe. Bjale, fao go be go le peu ya tlhago ya Abraham, ka tiro ya tumelo e

tšweleleditše seo; eupša Peu ya kgontha ya Abraham e be e le Kriste, Beibele...e bego e le Peu ya bogoši ya Abraham. Bjale hlokomelang.

⁹⁸ Abraham, pele ga tshenyo ya mollo mo letšatšing la gagwe, go bile le leswao le dirilwe go Abraham, sehlopha sa Gagwe se se kgethilwego. Gomme e be e le, Modimo o tlide fase ka sebopego sa monna, a retolla magetla a Gagwe go tente go tloga moo Sarah a bego a le gona, le go bolela se Sarah a bego a se bolela ka tenteng. Gomme Jesu o tla go dikologa gomme o rile selo sa go swana se tla ba bofelong bja lebaka. Bjale, yoo e be e le Abraham.

⁹⁹ Ka gona peu ya gagwe ya tlhago, ge Mesia a etla. Gomme Simone o tlide go Jesu, gomme O mmoditše leina la gagwe e be e le Simone, gomme o be a le morwa wa Jona, a tseba sephiri sa pelo ya gagwe. O boditše Filipi...goba Nathaniele, yo Filipi a mo hweditše, “Ke go bone ge o be o le ka tlase ga mohlare.” O boditše mosadi mo sedibeng, “O bile le bannabagatša ba bahlano”; gomme o rile, “Mohlomphegi, ke a bona O moprofeta.” Le a bona, bofelo bja peu ya tlhago ya Abraham bo hweditše leswao lela.

¹⁰⁰ Gomme e akanyeditšwepele ke Peu ya bogoši Yenamong, Kriste, gore Peu ya bogoši, mo bofelong bja matšatši a bona, ba tla hwetša selo sa go swana. Bjale ke a holofela re a e hwetša.

¹⁰¹ Mo fetotše. Elang hloko, Modimo o fetotše leina la Abraham. Bokaonana ke tlogele yeo. Ge ke bowa morago bakeng sa tsošeletšo ye telele, re tla ya ka go yeo. O ile a swanela go fetola leina go tloga go leina la gagwe la lefaseng, go ya go leina le le filwego ke Modimo.

¹⁰² O re, “Leina la motho le dira eng le e ka ba eng?” Oo, ngwanešu, ge feela o ka be o tsebile! Gobaneng, a mangwe a maina a a sebjalebjale re nago le wona! Ga ke nyake go a bitša, gobane a tla gobatša maikutlo a lena. Eupša Modimo o na le maina gore go ra dilo, go fetola tsela ka moka. Oo, o re, “Ditšiebadimo!”

¹⁰³ Go reng ka-go reng ka Jakobo? Pele a eba mokgoma pele ga Modimo, o ile a swanela go ba le leina la gagwe le fetotšwe go tloga go Jakobo go ya go Israele. A yeo ke nnete? Kgontha. Paulo; Saulo o ile a swanela go ba le leina la gagwe le fetotšwe go Paulo. Oo, ke ba bakae re ka ba bitšago, le go bolela gore Modimo o fetotše leina la bona! Abram go Abraham, Sarai go Sarah, go fetola leina la bona. Oo, nna! A tšhegofatšo, go tsena ka kerekeng tsoko ye nnyane le sehlopha se se kgethilwego, le go ya go ruta seo, go bona dihaleluya ka pelong, ge le bona se Modimo a se dirago.

¹⁰⁴ Bjale, bošegong bja go feta ke be ke hlaloša go “gare ga mothalo” le go “e tiišetša.” Ke nyaka go no e betha gape pele ke eya ka go sehlogo sa ka. Gore, Modimo o fetotše Abraham go tloga go monna wa go šošobana, yena le Sarah, morago go

banyalani ba baswa, o fetotše go beng ga bona ga tlhago pele ba ka amogela morwa wa tshepišo. Leswao la mafelelo ba nago le lona e bile ponagatšo ya Modimo ka nameng, o kgonne go bala pelo ya mosadi ka morago ga Gagwe, ka tenteng. Gomme selo sa go latela e bile gore mebele ya bona e fetotšwe. Bjale, bosegong bja go feta ke be ke eba thari, gomme ke kgonne go ikwela ba bangwe ba makala ka seo. Ke nyaka go fela ke e tliša kgauswana gannyane.

¹⁰⁵ Bjale, netefatšo ya yona e bile gore, ge bobedi ba tšere leeto le letelele lela, ba be ka go felela ba fetogile. Gomme Beibele e rile, “Bobedi ba be ba fedile kudu mo mengwageng. Gomme mmele wa Abraham o be o no swana le go hwa, gomme popelo ya Sarah e be e hwile.” A yeo e be e le nnete? Re a tseba ba be ba hwile, eupša Modimo o ba fetotše. Bjale go e netefatša go lena, gore O e dirile. Sa pele, gobaneng Mofilisita yola (goba e sego...), ee, ke a dumela e be e le kgoši ya Mofilisita, a ratana le Sarah, mokgekolo? Gomme o be a le botse go lebelelwā.

¹⁰⁶ Selo se sengwe. Ge Isaka a tswetšwe, gomme Sarah le Abraham ba tšofetše, ba loketše go hwa, nako yeo ba phetše, gomme Isaka a nyala ge a be a le bogolo bja mengwaga ye masomenne; Sarah o hwile. Gomme Abraham o nyetše mosadi, Katura, gomme o bile le ba bahlano, barwa ba tshela, ke a dumela e be e le, ntle le barwedi, morago ga fao; gomme fa, mengwaga ye masometshela ya go feta, o be a no ba gabotse bjalo ka mohu! K-e-t-u-r-a, Katura. O nyetše Katura, masometlhano goba masometshela a mengwaga ka morago ga fao, gomme o bile le barwa ba tshela ntle le barwedi ba gagwe; gomme mengwaga ye masometshela pele, o be a no ba gabotse bjalo ka mohu. Haleluya! Ke lena bao! Tshepišo ya Modimo ke kgonthē. Amene. Oo, ke a E rata!

¹⁰⁷ Go no tla go lena beng le go bala! Lehono, morago ka dikgweng, go baleng, ke ne se sengwe se sennyane ke nyakago go se hhalosa.

¹⁰⁸ Israele. Batho ba Modimo letšatši le lengwe ba be ba le tlase ka Egepetā, ba rekišeditšwe ka bokgobeng, gomme ga se ba kgone go thuša go beng fale. Peakanyo kgolo ya Modimo ye e kgethetšwegopele e ba rometše kua. O be a boditše Abraham ba be ba tla diilela nageng ye šele lebaka la mengwaga ye makgolonne. Gomme fao ba tla go swana le batho ka moka, gomme ba be ba le makgoba. Ge mo—ge monna wa Moegepetā a be a nyaka go kata basetsana ba baswa ba Bahebere, ga go selo se bego se ka bolelwā. Ge ba be ba nyaka go bolaya masogana a bona, ba ba bolaile, ga go selo se bego se ka bolelwā. Ba be ba le makgoba. Ba ba lahletše borotho bja bona bja go uta. Ba bo ja, goba go dira ntle; le pelaelo, ba bolailwe! A lefelo la batho ba Modimo!

¹⁰⁹ Eupša letšatši le lengwe, haleluya, Modimo o gopotše tshepišo ya Gagwe go Abraham. Letago! Bjale ke thoma go ikwela bodumedi gape. Elang hloko, Modimo o gopotše tshepišo ya Gagwe go Abraham. Gomme O tloditše moprefeta, ka Pilara ya Mollo godimo ga gagwe, gomme o tlide fase ka nageng le go thoma go ba eletša ka tshepišo ya Modimo ye e bego e sa kgone go šitwa. Gomme Modimo o be a le gona go hlatsela Lentšu la Gagwe. Nnete. O ba boditše ka naga ye e bego e ela maswi le todi, Modimo o be a ba file yona. Ba matšitše go tšwa Egepeta ka maatla a bopaki bja moprefeta yo ka Pilara ya Mollo godimo ga gagwe, gobane o be a ronngwe. Gomme Modimo o netefaditše O be a na le yena.

¹¹⁰ Bjale ge ba tlide lefelong le le bitšwago Kadese-banea. Yeo e bile nako ye nngwe setulo sa kahlolo sa lefase, Kadese-banea. Gomme fale ba bile le mohlabani magareng ga bona, ka leina la Joshua. Gomme lentšu *Joshua*, ka Sehebere, le ra “Jehofa-mophološi.” Gomme Joshua, mohlabani yo mogolo... Bjale elelwang, ga se nke ba ke ba bona naga ye, ba be ba kwele feela ka yona. Le bona sekai bjale? Feel a ba kwele ka ga naga. Ba tlogetše tšohle go ya nageng ye, gobane Lentšu la Morena le tlišitšwe go bona, le go tuišetša gore ba be ba le tseleng ya bona go ya nageng ye. A sekai sa Kereke, mo tseleng ya bona, ga ba tsebe selo ka yona, ga go le o tee wa bona a kilego a ba godimo kua. Eupša Joshua, ge ba fihlile kgauswi le mollwane, mo Kadese, setulo sa kahlolo, moo kahlolo e rathilego Israele, go tšwa go yena yo a biley mošola le go bowa morago. Gomme Joshua o tsheletše mošola wa Jorodane, mošola ka go naga ya tshepišo, le go tliša bohlatsé morago gore e be e no ba tlwa se Modimo a rilego e be e le. Gomme ba kgonne go latswa diterebe tše di bego di godile ka go naga yela ya lethabo.

¹¹¹ Bjale, ba be ba tshepišitšwe gore ba ka kgona go ba le legae moo ba ka kgonago go lokologa, ba ka kgona go godiša bana ba bona ka go go hlomphega le—le poifo ya bomodimo, ba be le kereke, le go ya pele. Ba be ba thabile bjang go tshelela mošola wa naga yela le go hwetša legae le, go tloga go beng makgoba. Elang hloko. Eupša ge ba kgabaganyeditše mošola, ba phetše maphele a bona, e be e le selo se segolo. Eupša mafelelong dithaba tša tla tša ritelwa ka matlapa a mabitla. Ba tšofetše le go hwa, ba tšofetše le go hwa, batho ba Modimo.

¹¹² Ka gona letšatši le lengwe fao go tla Mohlabani yo mongwe yo mogolo, yo mogologolo go bona bohole, Jehofa-Mophološi, *Jésu*, O tlide, gomme O rile, “Go na le Bophelo mošola wa lehu! Ka gore, ka ntlong ya Tate wa Ka go na le dintlokogparara tše ntši. Ge go ka be go se bjalo, nkabe Ke le boditše. Ke tla ya le go lokiša lefelo, le go bowa gape go le amogela go Nnamong.” Gomme Mohlabani yo mogolo yo o tlide go Kadese-banea ya Gagwe, setulo sa kahlolo go rena bohole, Khalibari! Fao O tšeetše godimo ga Gagwe bokgopo bja rena bjohle. Gomme O tshetše noka ya

Jorodane ye re e bitšago lehu. Gomme ka letšatši la boraro O tsogile gape, boka Joshua a etla morago go kgabaganya noka, go tliša bohlatse gore “motho yo a hwilego a ka phela gape.”

¹¹³ Gomme O rile, go dira ya lena . . . nnete ya lena, “Ke nyaka le ye godimo kua toropongkgolo ya Jerusalema, le go leta kua. Ke ya go le fa tuišetšo ya Lona. Ke ya go le fa bohlatse, peeletšo.” Gomme ba ile godimo go toropokgolo ya Jerusalema le go leta go fihla Bophelo bjo Bosafelego bo tlie boka phefo ye maatla e tšutlago.

¹¹⁴ Gomme lehono, ka morago ga mengwaga ye dikete tše pedi, re sa na le bohlatse gore re fetile go tloga lehung go ya Bophelong. Joshua wa rena o tlišitše bohlatse morago, gomme re tseleng ya rena go ya Nageng yela ya tshepišo, go latswa dimpho tša legodimong tša Modimo tše A di tlišitšego morago go rena. E hlokomeleeng, go makatša bjang! Lebelelang mo le kilego la ba gona. Letagwa . . .

¹¹⁵ Ke kopane le ngwanešu lehono; ke bile le maikutlo a go se tlwaelege go retologa mokgotha wo o itšego, le go ya ka tsela. Ke lebetše gore leina la monna e be e le mang. A ka no ba a le mo ka kopanong. Go le bjalo, ge a se, ka baka la eng, Modimo o be a lokile go yena. Ke Moindia, karolo ya Moindia. O tšwa Virginia. Moya wo Mokgethwa o rile go nna, ke sa e bolele. Ke tlogetše mosadimogatša wa ka ntle. O rile, “Eya tlase ka tsela ye, gomme o retologe khona ye.” Ke ile tlase kua. Oo, e direga nako yohle. “Leta thwi mo.” Ka gona ke letile kua metsotso e se mekae. O rile, “Retologa gomme o ye morago godimo ka tsela ye.” Gomme, ge ke dirile, ke kopane le yena.

¹¹⁶ O rile, “Ngwanešu Branham, ke a go tseba.” O rile, “Ke tla Jeffersonville nako ye nngwe, le go go hwetša.” Gomme o rile ke . . . “O be o le mošwamawatle.” Eupša o be a tagilwe, ka bophelong bja gagwe. Ke ile ka swara seatla sa gagwe, yena a sa tsebe se ke bego ke se dira. Gomme o be a na le go swa ga sebete. Ge ke be ke eme fale ke swere seatla sa gagwe, mororomelo wa ntlogela. Eng? O fodišitšwe. Thwi fale mo khoneng ya mokgotha, ba e kwa ka toropongkgolo ya lena.

¹¹⁷ Ga ke tsebe monna . . . A o gona? Ga ke tsebe. Ge a le, o . . . Ga—ga ke tsebe. O rile o—o be a nyaka go ya morago gae. Ke nagana o be a swanetše go ya. O be a le mo—mo monna wa Moindia, ke nagana o be a nyetše mo—mo mosadi yo mošweu. Gomme o be a etšwa Virginia. Gomme ke lebetše gore leina la gagwe ke mang. O be a dula fase mo tikologong ya Logar goba se sengwe sa go swana le seo. Gomme o be a bile tsela yohle go ya Jeffersonville. Eupša o bile le maikutlo go sepelela godimo khoneng; Moya wo Mokgethwa o rile, “Eya tlase ka tsela ye.” O Modimo, eba le kgaogelo! Ke lena bao.

¹¹⁸ Nka kgona go tše diiri ka morago ga diiri, go le botša dilo tše ke di bonego di direga le go di dira ka mokgwa woo. Gobaneng?

Jesu, Mohlabani yo mogolo wa rena, o ile godimo le go fenya naga, o fentše lehu, o fentše hele, o fentše lebitla, o tsogile ka letšatši la boraro, gomme o rile, “Ke nna Yo a bego a hwile, gomme ke phela gape go ya go ile, gomme ke swere dikgonyo tša lehu le hele.” Šoo Mofenyi, ge e sa le A kgeila seširo ka bobedi. Šole O eme!

¹¹⁹ Go swana le kgaetšedi wa go tšofala wa mokhalate. Ntshwareleng, bagwera ba ka ba makhalate ka mo. O be a efa bopaki ka kopanong, gomme o be a le borwa kudu ka polelo ya gagwe. O rile, “Gabotse, ke nyaka go le botša se sengwe bošegong bjo.” O rile, “Ka kgontha ga ke se ke swanetšego go ba.” Gomme o rile, “Ka kgontha ga ke se ke nyakago go ba. Eupša selo se tee ke se tsebago, ga ke se ke bego ke le sona.” Kafao o be a tlie felotsoko!

¹²⁰ Gomme ke re, yeo ke yona bošegong bjo! Nako ye nngwe re be re lahlegile ka sebeng. Gomme lehono, ka go amogela bohlatsé, tshepišo ye e bušitšwego (tefo ya peeletšo go phološo ya rena ya Gosafelego), re tsogile go tloga lehung go ya Bophelong, le go phela ka godimo ga yona. E tla ba eng ge re hwetša tefo ya go tlala, le go tshelela mošola wa noka, renabeng, ka go Naga yela ya letago?

¹²¹ Teko ye kgolo! Bjale Abraham, morago ga dilo tšohle tše tša go makatša, o ile a lekwa morago ga ge a amogetše tšhegofatšo. Abraham o ile a lekwa.

¹²² Bjale moo ke mo batho ba palelwago. Bjale, theetšang sekgauswi ka kgontha bjale, le se e foše. Beibele e boletše, gore “Morwa yo mongwe le yo mongwe a tlago go Modimo o swanetše go solwa, a solwe, a otlwe. Gomme ge re sa kgone go emela tsholo, re ba bana ba dihlaba, gomme e sego bana ba Modimo.” Go netefatša gore tumelo ya rena e be e se seo re rilego e be e le, ga re na seo re ipoletšego go ba le sona. Bjale re ya tlase ka go boCalvin bjo bobotse bja kgontha bjale, kafao re swanetše go hlokomela seo. Bjale hlokomelang, “Morwa yo mongwe le yo mongwe yoo a tlago go Modimo o swanetše go kgalwa, a kgalwe,” Lentšu le mo hwipinya le go mo ripaganya ka diripana, go rotlela thutotumelo ye nngwe le ye nngwe ntle go tšwa ka tlase ga gagwe; le a bona, go lekwa, le go bona ge eba ke yena morwa wa Modimo.

¹²³ Bjale Abraham, morago ga ge a amogetše tšhegofatšo, o bile nako yeo morago ga ge a lekilwe.

¹²⁴ Nako yela e ya kae? Ebile ga ke ne go kgabola sehlogo sa ka, gomme ke nako go tswalela. A le tla nkgotlelela metsotsø ye mengwe ye lesometlhano? [Phuthego e re, “Amene.”—Mor.] Ke a leboga. Ebang le tlhomphokgolo. (Abraham. Lebelelang Noage.) A re e tšeeng feela nakwana. Re ka se itlhaganele; ga go ne tlhoko. Gomme, nna, re potlaka ka eng? Ke no ba ke nokologa. Ga—ga ke swane le ba bangwe ba baisa ba ba kgonago go ema, ba no

kgona go e phetlela thwi go tloga ka mokgwa woo. Ke—ke—ke a nokologa, ke swanetše go leta go fihla A mpha yona.

¹²⁵ Lebelelang Noage, morago ga ge Modimo a mo dirile go rera mengwaga ye lekgolo le masomepedi, thwi ka bogareng bja lefase le legolwane la saense go feta re nago le lona lehono. Oo, nnete, ba agile diphiramiti. Re ka se kgone go di aga. Ba agile meago ya mafekefefe. Re ka se kgone go e aga. Ba manegile mebele go e dira e bonale ka tlhago le bjale lehono. Re ka se kgone go e dira. Ba be ba na le tai yeo ba bego ba ka kgona go bea ka go dilo, gore mmala lebaka la mengwaga ye dikete tše nne ga se wa ke wa fetoga. Ga re nayo. [Lefelo la go se be le selo godimo ga theipi—Mor.] Gomme go laeditše gore ba be ba na le tlhabologo ya go swana le yeo Jesu a rilego, “Bjalo ka ge go bile ka matšatsing a Noage.” Gomme Noage, ka go lefase lela la saense, a rera, “Pula e ya go wa go tšwa legodimong, gobane Lentšu la Modimo le boletše bjalo!” Noage o be a le moprofeta.

¹²⁶ Gomme ge le bona baprofeta ba tsoga, bokaone le hlokomele, kahlolo e tseleng ya yona.

¹²⁷ Kafao gona Noage a rera, gomme batho ba e gana, ba segile sefahlegong sa gagwe. Ke kgona go eleletša ba bangwe ba bona ba rile, “Seo ga se kgotsofatše tumelelo ya ren a saense.” Huh!

¹²⁸ Ke a eleletša, selo sa go swana boka se le lehono. Ba bolela gore, “Go goelelša le go tumiša Modimo, le go lla, gomme bjo mo bo bitšwago bophelo bja ‘mopshikologimokgethwa’ le dilo, bjohle ke go itiriša ga maikutlo.” Ga e kgotsofatše tumelelo ya bona ya saense, eupša e kgotsofatša Beibele ya Modimo. Seo ke kgwekgwe. Elang hloko.

¹²⁹ Ke a eleletša saense e tlie ntle gomme e rile, “Lebelela, moisa. Lebelela, o—o mohuta wa go hlakana hlogo. Lebelelang mo. Ke, re na le rader, re ka kgona go thunya ngwedi goba go romela Seputiniki godimo kua. Ga go ne lerothi le tee la meetse gare ga fa le fale. Bjale e tšwa kae?”

¹³⁰ Ke kgona go kwa Noage a bolela, “Modimo o boletše bjalo! Gomme ge Modimo a rile go be go le bjalo, Yena ke Jehofa-Jireh, O kgona go fa meetse godimo kua. Modimo o boletše bjalo! E ya go direga, go le bjalo!” Yo mongwe o rile . . .

¹³¹ O tšeа monna a ehwa ka kankere, moriti wa monna, šo yena; ngwaga wo o latelago ke monna yo mokaone wa go phelega. E diregile bjang? O mo robaditše morago . . . Ke na le makgolo a mabopaki ao. Monna o be a šetše a tšwele ka bophelong bjo, ngaka o be a saenne setatamente, “O hwile, o be a hwile diiri ka morago ga diiri.” Gomme Modimo o fa pono, gomme o a phela bjale. Bjang? Le se ke la mpotšiša. Ga ke tsebe. Eupša Modimo o rile, “Fodišang balwetši, tsošang bahu, lelekelang bodiabolo ntle.” Yeo ke nnete.

¹³² Neng le neng ge o babja gomme Modimo o bitša phodišo, o no ya pele—pele le ngaka ya gago, a nke a go botše ge o fodile. O tla go fa . . . Seo se tla fa bopaki go yena. Ge a re, “Gabotse, yohle e ile”; o re, “Tumišang Modimo! Ke a go leboga, ngaka, bakeng sa ditirelo tša gago,” gomme tšwelapele o eya. Le a bona? Yeo ke nnete. Hlokamelang.

¹³³ Bjale Noage, o rile, “Go tla pula, lefase ka moka, e ya go gogola batho ba babe.”

¹³⁴ “Aa, ditšiebadimo! Re ne dikereke tša rena. Modisa wa rena ga a bolele selo boka seo. Mokgalabje o hlakane hlogo ya gagwe, o aga areka godimo kua. A le nagana gore yo mongwe o tla e dumela?”

¹³⁵ Letšatši le lengwe, Modimo o rile, “Ke kwele go kwera ga bona go lekanelia. Ke komana bjale. Eya ka gare!” Gomme mo go tla diphoofolo, tše pedi ka tše pedi, parrot ya tona le ya tshadi, phorogohlo ye tona le ya tshadi, pudi ye tona le ye tshadi, nku ye tona le ye tshadi, tau, nkwe, tšohle tše di hemago mohemo godimo ga lefase, di tsene ka arekeng.

Noage o rile, “Leo ke leswao la lena la mafelelo!”

¹³⁶ Gomme ga se ba ke ba e dumela. “Eyang godimo gomme le phele le diphoofolo tša lena tša go nkga.”

¹³⁷ O be a le fao, Noage a obamela Modimo. Ga go kgathale se lefase le se boletšego, o theeditše Modimo; o be a le moprofeta. O tsene ka arekeng, gomme Modimo o tswaletše lemati ka morago ga gagwe.

¹³⁸ Bjale ke kgona go eleletša, ba bangwe ba badumedi ba mollwaneng, bao ba dutšego tikologong le go theetša molaetša wa Noage, gomme ba fologa seripana, le a tseba, ba rile, “O a tseba ke eng, mokgalabje yola a ka no be a be a nepile. A re yeng godimo le go ema tikologong. O rile, ‘E ya go thoma go na ge lebati lela le tswalelwé.’ Modimo o mmoditše O tla tswalela lemati, e be e eya go na. A re yeng godimo le go ema tikologong. Gomme ge e ka thoma go na, re tla kokota mo lebating. Gobane ke mokgalabje wa pelo ya go loka, o tla bula lebati.”

¹³⁹ Le a bona, dinako tše dingwe le lebeletše motseta sebakeng sa Molaetša. Modimo o tswaletše lemati. Ga go kgathale Noage o be a le pelo ye botho gakaakang, e be e le Modimo yo a dirilego go tswalela le go bula, e ka ba eng A e nyakago.

¹⁴⁰ “Ngwanešu Branham, go na le monna o dutše tlase mo khoneng. Eya tlase gomme o mo fodiše, re tla dumela go phodišo Kgethwa.” Yoo ke diabolo.

¹⁴¹ Yena wa go swana o rile, ge ba beile lenkgeretla go dikologa sefahlego sa Gagwe le go Mmetha godimo ga hlogo, ka kgorongtsheko, o rile, “Ge O le moprofeta, re botše ke mang a Go bethilego bjale. Re tla e dumela.” Ga a direle motho motlae. “Ge O le morwa wa Modimo, fetolela matlapa go ba borotho. Ge

O le!" A ka be a e dirile, eupša Yena ga a direle motho motlae. "Ge O le morwa wa Modimo, fologa sefapanong." Baruti ba be ba bolela seo, le a bona. Ga se a direle motho motlae.

¹⁴² O dirile feelsa bjalo ka ge Tate a Mmontšhitše, gomme ga go selo gape. Seo ke se A se boletšego, Mokgethwa Johane 5:19, "Morwa ga a kgone go dira selo ka go Yenamong, feelsa se A bonago Tate a se dira." Ke lena bao. Elang hloko.

"Re tla ya godimo le go ema go dikologa areka, ge e thoma go na . . ."

¹⁴³ Ke a eleletša Noage o rile . . . O tsene ka gare ga sekga sa mathomo, a namelela godimo go sekga sa go latela (dinonyana) go tloga go dilo tša go gagaba, go ya godimo go ofisi ye e latelago. Go tloga go tokafatšo, godimo go ya go tlhwekišo (dinonyana), morago o ile go tloga fao go ya pele ka go kolobetšo ya Moya wo Mokgethwa; moo lefastere le bego le le gona, moo seetsa se bego se kgona go tsena. "Ke tsogile ka legodimong, ka dula fase." O rile, "Go lokile, lapa, lena bao le tlago ka fa le nna, mo mosong . . . Go ba thari morago ga sekga lela se bjale. Bjale Modimo o tswaletše lemati tlase fale. Mo mosong, go tla ba le leswiswi gohlegohle lefaseng. Mosong, dipula di tla ya go wa gomme areka e tla phaphamala, gomme Modimo o tla—o tla fediša yo mongwe le yo mongwe wa badiradibe bale ba sehlogo bao ba sa dumelgo Molaetsa." Bohle ba bona ba letile.

¹⁴⁴ Mosong wa go latela, o tsogile, o lebeletše ntle, botse le go phadima. O ile ka arekeng, ke ba bakae ba tsebago ke letšatsi lefe a ilego ka go lona? Letšatsi la 17 la Mei, ge Noage a be a le mengwaga ye makgolotshela bogolo. Letšatsi la 17 la Mei, Beibele e boletše bjalo. Gomme ge a ile ka gare, letšatsi la 17 la feta, letšatsi la tla godimo go no fiša bjalo ka ge le kile la ba.

¹⁴⁵ Ke tla ba eleletša, mollwaneng, ba re, "Aa! Ke le boditše go be go se selo go yona! Lena bohole le lekeletše go dikologa godimo kua bakeng sa eng? Tlogang go moradia yo mobjalo!"

"Gabotse, ke a thankya yeo e be e lokile."

¹⁴⁶ Eupša, le a bona, go na le mothalo wa go aroganya woo o ogilwego magareng ga tumelo le gosedumele. Gomme e ka ba o tla ka lehlakoreng le tee goba le lengwe. Gomme go na le nako ge o amogela pitšo ya gago ya mafelelo.

¹⁴⁷ Kafao, letšatsi la bobedi, a manyami ao a bilego go Noage le kereke ya gagwe, ge a ba boditše Modimo o ya go senya lefase. Eupša le tseba botelele bjo a e beetšego ntle? Matšatsi a šupa, ga go selo se diregilego. Teko!

¹⁴⁸ Ka gona ka letšatsi la seswai, go be go le leswiswi gohle godimo ga lefase, marothi a magolo a thoma go wa go tšwa lefaufaung, meetse a thoma go tšhela, gomme methopo e be e phulegile. Mekgotha e tletše ka meetse. Batho ba kokotile mo lebating, eupša Noage ebile ga se a kgone go ba kwa. Gomme o

phaphametše ka godimo ga thaba ya godimodimo, gomme bohle ka ntle ga areka ba senyegile.

¹⁴⁹ Modimo a leka Noage, go bona ge eba o tla leka go namelela lefastere ntle, goba se sengwe. Ka morago ga ge A šetše a dirile tshepišo, Noage o e beile ntle!

¹⁵⁰ Yeo ke yona! Ge o na le tshepišo, gomme o a tseba ke tshepišo, dula le yona! Abraham o ile a swanelwa ke go lekwa. Dulang le tshepišo!

¹⁵¹ Bjale, ba na le leswao la bona la mafelelo. Ka gona mmele wa bona o ile wa fetolwa. Gomme ka pela Isaka yo monnyane o tšweletše tiragalong, mošemane yo monnyane wa go ratega wa Mojuda. Ke tla eleletša ka morago ga matšatši a gagwe a seswai o be a boloditšwe. Ka fao mme yo moswa, bogolo bja mengwaga ye lekgolo . . . Ka fao gore Abraham, mengwaga ye lekgolo bogolo; goba masomesenyane a gagwe, gomme yena lekgolo; ka fao ba swanetšego go be ba be ba le e ka ba, e ka ba bomasomepedi bja bona, ba thakgetše. Moisa yo monnyane yo, o be a le bose bjang!

¹⁵² Gomme le a tseba, Modimo o rile, “Bjale go dira batho mo matšatšing a go tla (Peu ya Abraham) go tseba, Peu ya gago e a tseba gore Ke boloka tshepišo ya Ka go motho e ka ba mang yo a tla swarelelago go Lentšu la Ka, Ke ya go mo fa teko.”

¹⁵³ Ge mošemane yo monnyane a fihlile e ka ba mengwaga ye lesomenne bogolo. Ke a eleletša, moriri wo monnyane wa go tatagana le mahlo a mannyane a mabotse. Oo, ka fao tate yola wa go thaba le mme! O tseba ka fao wena motswadi o lego le ngwana wa gago, ngwana a nnoši. Ka gona Modimo o rile go Abraham. . . Bjale, A ka se e bolele go Sarah, gobane Sarah e be e le sebjana sa mofokotšana. Gomme kafao O rile, “Abraham, Ke nyaka o tše mošemane yo monnyane yo yoo Ke go filego, yena yoo Ke yago go go dira tate wa ditšhaba tše dintši ka yena, gomme Ke nyaka o mo tšelee godimo ga thaba yeo Ke ya go go laetša bošegong bjo ka ponong, gomme fao o mmolae.” Senya kholofelo e nnoši ye e bego e le ya gagwe go ba tatago ditšhaba, go Modimo go boloka Lentšu la Gagwe; Modimo o rile, “Ke go dira tatago ditšhaba.” O letile bjale mengwaga ye yohle, go fihla a le bogolo bja mengwaga ye lekgolo, lekgolo le lesomenne la mengwaga bogolo. “Gomme mošemane yo monnyane šo bjale, gomme bohlatse bo nnoši bjo o nago nabjo gore Ke tla boloka Lentšu la Ka, o a ya le go bo senya. Ke sa ya go go dira tatago ditšhaba ka ngwana yo.”

¹⁵⁴ “Gomme Abraham,” o rile, “ga se a thekesela go tshepišo ya Modimo. O tsebile gore o mo amogetše bjalo ka yo a tšwago bahung. O tsebile, ge Modimo a tshepišitše bjalo, A ka kgona go mo tsoša go tšwa bahung.”

¹⁵⁵ Gomme gona re Peu ya Abraham? Gomme phošo e tee ye nnyane ya thutamodimo e ka kgona go thunya ka tseleng, go ba go tsebalega le banna le basadi ka moka, le ya go yona go na le gore le dule le Lentšu. Dihlong go lena! Mokgatlo tsoko wo

mogolo, seo se ra eng go Modimo? O tla o swiela ka mokgwa *woo!* [Ngwanešu Branham o thwantšha monwana wa gagwe—Mor.] O kgole go tloga go wona, go bile ge e sa le ba kgatlofatša, wo mongwe le wo mongwe wa yona, gomme ka mehla e tla ba. E sego batho ka batho ka kua, eupša tshepedišo ya mokgatlo, e kgahlanong le Modimo. Kereke ye nngwe le ye nngwe ye e kgatlofaditšwego ke mme... goba morwedi wa mokgatlo wa Katoliki. Beibele e boletše bjalo, Kutollo 17, “Mmalegogwana wa kgale, le barwedi ba gagwe ba mmalegogwana.” Nnete tlwa.

¹⁵⁶ Re na le yena a dutše thwi fa bjale godimo ga setšhaba sa rena. Dihlong go lena Mademocrat a makaone ao a rekišitšego ditokelo tša lena tša tswalo! Go lokile, re tla tlogela seo go sepela, go fihla ke boa morago. Elang hloko. Ke ba thari. A Kriste wa lena ga a re kudu go lena go feta dipolitiki tša lena? Le swanetše go dira se Abraham Lincoln a se boletšeego. Go lokile. Elang hloko, re ya pele.

¹⁵⁷ Bjale Modimo o rile, “Wena tše moisa yo monnyane, mo tseele godimo kua ntlhoreng ya thaba.”

¹⁵⁸ Bjale le nyaka go tseba ge eba Abraham o be a le lesogana goba aowa? O ile leeto la matšatši a mararo le ngwana, le dikgong, le mohlanka, le tonki. Bjale motho e ka ba mang, motho wa mehleng... Ke be ke fela ke patrola methalo ya mohlagase, ke fela ke sepela ge ke be ke le mohlokemedi wa diphooefolo; gomme ke kgona go sepela, ga bonolo, dimaele tše masometharo ka letšatši. Gomme re na le maoto a patrole, re a e bitša. Eupša bona monna, mokgwa wa bona o nnoši wa senamelwa ke ka leoto, goba go namela tonki. Gomme šeba ba be ba ne tonki ye nnyane ya go nokologa; gomme re ka kgona go mo šia ka go sepela. Gomme o be a le mo, leeto la matšatši a mararo, gomme ka gona a phagamišetša hlogo ya gagwe godimo gomme a bona thaba kgolekgole, go le bjalo. O swanetše go ba a bile e ka ba dimaele tše lekgolo go tloga tlhabologong, tsela morago ka leganateng. Bjale theeletšang, gomme elang hloko.

¹⁵⁹ Ka gona o tšere dikgong gomme a di bea godimo ga mokokotlo wa Isaka; sefapano, Morwa wa Modimo mengwaga ya moragwana. Gomme Isaka o rwele dikgong go rotoga thaba, tše a bego a eya go di robalela bakeng sa sehlabelo. Go bontšhapele!

¹⁶⁰ Ge Modimo a bontšhitšepele seo go mothalo; Mosadimogatša wa Loto, o se ke wa retologa go dikologa le go lebelela morago go dilo tša lefase. Tšohle dikai tšeо le meritи di phethagetše. Le a bona? Elelwang Efa. Elelwang mosadimogatša wa Loto. Elelwang Loto ka boyena, wena monna. Elelwang, Adama o ineetše go mosadimogatša wa gagwe; Loto, tsela ya go swana. Hlokomela. Ke no le botša, bjalo ka ngwanešu. Go thari go feta ka mo le naganago.

¹⁶¹ Elang hloko Isaka yo monnyane o be a eya go rotoga thaba. Gomme a ba le go gonona. Gomme a lebelela go dikologa, gomme a re, “Tate wa ka?”

Gomme o rile, “Ke nna yo, morwa wa ka.”

¹⁶² O rile, “Dikgong šedi. Gomme šedi tšohle, se sengwe le se sengwe, mollo. Eupša kwana e kae ya moneelo wa go tshungwa?”

¹⁶³ Theetšang papa yola wa kgale, ntle le go roromela ka go segalontšu sa gagwe, o rile, “Morwa wa ka, Modimo o tla ipha sehlabelo Yenamong.” Morwa wa gagwe a nnoši o ya tlhabong, eupša efela pelo yela ya kgale ya go botega e tsebile gore Modimo ga a kgone go aketša.

¹⁶⁴ Yeo ke Peu ya Abraham lehono! “E ka ba bjang, Ngwanešu Branham?” Modimo o tla ipha Yenamong! “O ya go dira bjang?” Ga ke tsebe. Eupša Yena ke Jehofa-Jireh!

¹⁶⁵ O ile godimo ntlhoreng ya thaba, a kgokološetša leswika godimo. A bea dikgong godimo ga maswika, gomme a le gotetša ka mollo. O rile, “Isaka, morwa wa ka, retologa go dikologa.” O tšere lenti go tloga go dikologa letheka la gagwe, gomme a tlema diatla tša gagwe le maoto a gagwe. Isaka, go obamela, bjalo ka ge Kriste a bile, go iša lehung. O mmeile godimo ga kota. A obeletša ka sekhwameng sa gagwe gomme a gogela thipa ye kgolo ntle; a e loutša makga a se makae, a lebeletše godimo go leba leratadimeng.

¹⁶⁶ “Ga se a thekesela go tshepišo ya Modimo ka gosedumele, eupša o be a tiile, a tseba gore o mo amogetše bjalo ka yo a tšwago bahung; o kgodišegile ka bottlalo gore ge Modimo a boletše bjalo, go yena go e dira, A ka kgona go mo tsoša go tšwa bahung.” Yoo ke Abraham, gomme yeo ke Peu ya gagwe ka morago ga gagwe. Ge yeo e be e le peu ya tlhago, Peu ya bogoši e swanetšego go ba eng? E sego go thekesela! Se Modimo a se bolelagoo, Modimo o tla se dira. Go tsebeng gore, o be a kgodišegile ka bottlalo; gore se Modimo a se tshepišitšego, Modimo o be a kgona go se dira.

¹⁶⁷ O louditše thipa; mahlo a mannyane a maso a Isaka a šeditše bogale bjo bogolo bjola bja bogale ge bo kitima godimo ga letlapa. O obeleditše morago; a lahla dikhele go tloga sefahlegong sa gagwe, a gogela seledu sa gagwe se sennyane morago. A phagamela godimo, gomme megokgo e kitima go theoga sefahlego sa gagwe ka mokgwa woo. A tseba, gomme a se thekesela go tshepišo ya Modimo! O phagamišitše seatla sa gagwe go phuhunyetša thipa ka mogolong wa morwa wa gagwe mong.

¹⁶⁸ Gomme ge a dirile, segalontšu sa Modimo se biditše, gomme sa swara seatla sa gagwe, se rile, “Abraham! Abraham, emiša seatla sa gago! Ke a tseba bjale gore o a Nthata.” O be A dira eng? A efa bopaki go Peu ya Abraham, ka morago ga gagwe.

“Emiša seatla sa gago, o se gobatše ngwana yo! Ke a tseba gore o a Nthata.”

¹⁶⁹ Gomme e ka ba ka nako yeo, Abraham o kwele se sengwe ka morago ga gagwe. Gomme o lebeletše, gomme kgapa e be e le fao (yeo ke nku ye tona) e tantšwe ka dinaka tša yona ka mabjanyeng le dithokgwa. Gomme Abraham o ile le go tsea kgapa le go e bolaya, sebakeng sa morwa wa gagwe.

¹⁷⁰ Kgapa yela e be e etšwa kae? E be e le dimaele tše lekgolo go tloga go tlhabologo. Gobaneng, dibata tša lešoka di ka be di e bolaile ge a ka be a be a le morago kua. Nnete, ke—ke phoofolo ya gae. E tswa kae? Gomme, ntle le fao, ke godimodimo ntihoreng ya thaba, moo go sego bjang goba meetse. Gomme Abraham o topile maswika gohle go dikologa, moo e bego e le, go dira aletara. E be e etšwa kae? E be e se pono; e tswile madi. Pono ga e tswi madi. Haleluya! Jehofa-Jireh o be a ineetše sehlabelo Yenamong!

¹⁷¹ Ge Modimo a tšewa Lentšung la Gagwe, O kgona go fa eng kapa eng A e hlokago. Modimo, Jehofa-Jireh, o sa le Jehofa-Jireh bošegong bjo. O na le Sehlabelo se šetše se filwe. O na le Kereke e filwe. O na le Motseta a filwego, Moya wo Mokgethwa. O fa bjale, Jehofa-Jireh. Morena o ineetše Beibele Yenamong, Moya, Kereke, Molaetša, Motseta. Gomme iri e fa bjale go Kereke go hlatlošwa le go tšeelwa gae. Jehofa-Jireh o tla fa mokgwa wa go ntšhetša Kereke yela ka ntle ga lefase le, ka go fetola mebele ye ya go fokola ya rena, le go e tšeela godimo ka Letagong. Jehofa-Jireh! Go tla direga bjang mo letšatšing la sebjalebjale boka re phela go lona, gore dilo tše di tla ba?

¹⁷² Billy, morwa wa ka, e ka ba kae a lego, le nna, re be re le ka India feela go se kgale. Gomme ke topile pampiri . . . Ge ke fologa sekepe, dikete di be di eme fale ka dikgare di pakelane. Ge re fihla godimo go Taj Mothele, ba bile le pampiri e letše fale, ka Seisimane. Gomme ke bone seripa se segolo ka go yona, se rile, “E swanetše go ba leswao tšišinyego ya lefase e fedile.” Molato e be e le eng? Gabotse, e ka ba matšatši a mararo goba a mane pele ga tšišinyego ya lefase ye kgolo ge o bala ka yona, dinonyana tšohle tše dinnyane tše di phetšego ka go maswika . . .

¹⁷³ Ka India, ga ba ne magora boka re na le ka California, United States. Ba dira magora a bona go tšwa go maswika ao ba a topago. Gomme dinonyana tše dinnyane di aga sehlaga sa tšona ka go ona. Ba dira ditora tše kgolo, gomme dinonyana di aga dihlaga tša tšona ka go yona. Gomme dinonyana tšohle tše nnyane, matšatši a mmalwa pele tšišinyego ya lefase e etla, di fofetše kgole go tloga go maboto. Gomme nakong ya mantšiboa goba . . . Bogareng bja letšatši, ge go fiša, dinku le dikgomo di be di ema ka tlase ga moriti wa leboto le tora, go tloga letšatšing la go fiša.

¹⁷⁴ Eupša matšatši a mabedi, dikgomo le dinku ga se tša ke tša tla lebotong. Di eme ntle bogareng bja lebala gomme di itshamile

e tee go ye nngwe, bakeng sa khomotšo. Morago tšhišinyego ya lefase ya tla, ya šišinyetša maboto ao fase. Gomme morago dinonyana tše nnyane tša thoma go boela morago, dikgomo go tšwa lebaleng. E be e le eng? Modimo wa go swana yo a kgonnégo go bitša dinku le dikgomo, le dinonyana, go ya ka arekeng, go laetša gore Yena ke Modimo wa go swana lehono yo a ka bitšago go tloša diphoofolo tša Gagwe.

¹⁷⁵ Gomme ge A kgona go hlahlha phoofolo ka sekwitlhahlo, ke bontši gakaakang Kereke ya Modimo e swanetšego go tloga go maboto a magolo a madirwa ke motho le dithuto tša dikereke. Babilonia e ya go wa, a mangwe a matšatši a. Jehofa-Jireh o ineetše Yenamong Lefelo la go Khutša bakeng sa lena. Fofang go tloga go ditora tša lefase!

¹⁷⁶ Fofang go tloga go matsaka a Hollywood! Dikereke di leka go ba kwera, di phadima. Ebangedi ga e phadime. Hollywood e a phatsima; Ebangedi e a kganya. Hollywood e phadima ka matsaka. Kereke ye kgolo e kganya ka thuto. Gomme Kereke ya Modimo yo a phelago e kganya ka boikokobetšo le bobose, le Moya wo Mokgethwa. Go na le phapano ye ntši gare ga go kganya le go phadima.

¹⁷⁷ O mo bjale. Jehofa-Jireh o ineetše go Yenamong. “Modimo o kgona ka matlapa a go tsošetša Abraham bana.” Ge dikerekemaina di sa O amogele, Modimo a ka kgona go tliša bana ba Gagwe go tšwa mekgotheng, bommalegogwana go tšwa dihoteleng. A ka kgona go tsošetša godimo eng kapa eng A nyakago go e dira. Eupša ge Modimo a file Molaetša, go na le yo mongwe felotsoko go O amogela. Jehofa-Jireh! Morena o tla ipha Yenamong Molaetša. Morena o tla neela Yenamong Motseta. Morena o tla ineela Yenamong, ka tsela ya Gagwe Mong, maswao go Kereke; e sego go tšoena, go bea maina a lena dipukung.

¹⁷⁸ Re kwa kudu lehono ka diphetho, diphetho tše ntši kudu. Ke botse bofe e bo dirago go pakela maswika ge o se ne moagi wa leswika fale go a sega le go a bopela ka go barwa le barwedi ba Modimo? Ke botse bofe e bo dirago go ba le dikerekemaina tše kgolo di agilwe ka dikete, ge eba yo mongwe a se gona ka Tšoša ye bogale ya magalemabedi ya Modimo go ba bopela ka go bana ba kgonthe ba Modimo? Bokaone o no ba tlogela ntle moo ba lego. Amene. Modimo (e sego Methodist, e sego bjalo ka Baptist, Katoliki), Modimo o ineetše Yenamong Thipa go kgoloka bana ba Modimo, barwa ba Modimo. Amene. *Jehofa-Jireh*, “Morena o tla ipha Yenamong.” Gomme O dirile! Mo dumele, gomme o phele.

A re inamišeng dihlogo tša rena feela nakwana.

¹⁷⁹ Modimo wa mogau, Modimo wa go phela go ya go ile, re gaogegele bjale, le go re fa mogau wa Gago. Ga re na maswanedi, Tate, go e ka ba eng yeo O tla re direlago. Eupša ga re ipolele gore re na le maswanedi, eupša re no arabela pitšo go tšwa go Modimo. Re a rapela, Tate, gore O tla re bopela bošegong bjo ka

go matlapa ao a tla lekanelago ka go Tempele ya Modimo, bakeng sa go Tla go gogolo ga Morena Jesu go Tempele ya Gagwe. E fe, Tate. Re lebalele rena badiradibe go ditšito tša rena. Utolla go rena Lentšu la Gago. Re laetše Tsela ya go sepela. Re rute, O Tate Modimo. A nke re E amogelete. Gomme ge e le kgahlanong le Lentšu, re a tseba gore ke morutiši wa go fošagala. Moya wo Mokgethwa ke morutiši wa rena. O ngwadile Lentšu, gomme A ka se rute e ka ba eng eupša Lentšu. Gomme re a rapela gore O tla e dira go bonagala go rena bošegong bjo, ka pelong ya rena. E fe, Modimo.

¹⁸⁰ Bjale ka dihlogo tša rena di inamišitšwe, mahlo a rena a tswaletšwe. Mogau wa Modimo o khutšE godimo ga rena, ke thapelo ya ka ya go kokobela le go hlokofala. E no dumelang bjale. Se belaeleng.

¹⁸¹ A go na le yo a itšego ka moagong, yo ke tsebago gore o gona, banna le basadi ba ba sa Mo tsebego, ga se wa ke wa amogela Sehlabelo sa Gagwe se se filwego, Morena Jesu, bjalo ka Mophološi wa gago? Ga o Mo tsebe? O ka no nagana ka bohlale o a dira. Eupša motho ga a kgone go bona Modimo go fihla a tswalwa gape. *Le a bona ga go re... Ga o bone ka mahlo a gago; o lebelela ka mahlo a gago. Go bona ke go “kwešiša.”* O lebeletše thwi go Yona, gomme wa re, “Ga ke e bone,” o ra gore ga “o e kwešiše.” O ka se tsoge wa tseba se re bolelagoo ka sona go fihla o tswalwa gape. Ga se nke wa ke wa ba le boitemogelo bjola? Ka dihlogo tša lena di inamišitšwe bjale, le mahlo a lena a tswaletšwe, a o ka phagamiša seatla sa gago, le go re, “Ngwanešu Branham, nkopole ka thapelong bošegong bjo. Ke a dumela gore re amogela Molaetša wa rena wa mafelelo. Letšatši ka lebelo le a ngwega. Gomme ke bona gore se o se boletšego ka Beibeleng ke therešo, gobane ke badile Beibele. Ke a dumela gore ke iri ye re swanetšego go tla bjale. Gomme, go nna, ke dira go ema ga ka bjale go Kriste”?

¹⁸² Modimo a go šegofatše. Modimo a go šegofatše, wena. Gabotse. Godimo ka bophagamong, diatla! E no phagamiša seatla sa gago, e re, “Go nna, bjalo ka ge Joshua a rile, ‘Go nna le ntlo ya ka, re tla direla Morena.’” Go lokile, yo mongwe gape? Ke no be ke letile. Modimo a go šegofatše morago fale. Ke bona seatla sa gago. Modimo a go šegofatše godimo kua. Modimo a go šegofatše. O a go bona. Godimodimo ka bophagamong, Modimo a go šegofatše godimo fao, mohlomphegi; selo se segologolo kudu o kilego wa se dira ka bophelong bja gago. Thwi ka lebatong la magareng, yo mongwe phagamišetša seatla sa gago godimo ka kua. Mohlomongwe ga se ka ke ka bona seatla ka kua, se ka no... Yo mongwe ka lebatong lela ka bogare godimo ka godimo? Phagamiša seatla sa gago, gomme o re, “Ngwanešu Branham, go nna, ke... Ke nyaka go Mo hlankela. Ke—ke hlokofetše.” Modimo a go šegofatše. Modimo

a go šegofatše. Modimo a šegofatše monna yo monnyane. Ka bophagamong go ya go la go ja, yo mongwe phagamišetša seatla sa gago godimo kua, gomme o re, “Ngwanešu Branham, nna, go nna, ke a tseba seo ke therešo. Nna ke... Ga ke tsebe Modimo, eupša ke nyaka go Mo tseba. Ke nyaka go ba le nnete. Ke a bona nka se kgone go leka mahlatse. Nka se kgone go tsoge ka tla morago gape.”

¹⁸³ “Tsela ye mohlare o sekametšego, ke tsela ye o welago,” Lengwalo le a bolela. Le se wele ka lehlakoreng le e lego tsela ya go fošagala. O ka kgona go e dira gabotse bošegong bjo. Elelwang, ge feela go na le Bokagosafelego, gomme ga se bja ke bja thoma gomme bo ka se tsoge bja fela, eupša o ba karolo ya bjona, o tla tlaišega goba o tla phela ka lethabo. O tseba bjang o ya go phela go fihla o fihla gae?

O re, “Ke yo moswa gampe.”

¹⁸⁴ Ke sa tšo hwetša molaetša nakwana ya go feta. Mohumagadi yo moswa morago ka nageng ya ka, o ile a no retolla ditsela ka phošo, a thoma go kgoga disekerete. O be a boditšwe ka Modimo, eupša ga se a ke a theetša. Bogolo bja mengwaga ye lesometshela, o be a etšwa go yena...aowa, bogolo bja mengwaga ye lesomeseswai, o sa tšwa go tšwa go thuto ya sekolo se se phagamego. Gomme o boditšwe, a leka go dira gabotse. Eupša o thomile go aroga le sehlopha sa phošo, legadima le mmolaile semeetseng.

¹⁸⁵ Feel a se kgale, monna wa lekhilate ka Shreveport o emeletše gomme o rile, “Ga go na selo se sebjalo ka Modimo.” A no rogana, a re, “Ga se bona selo eupša sehlopha sa bapshikologibakgethwa.” Legadima la mmolaya. Ba mo tšeetše lebitleng. Gomme ge ba be ba boloka monna yola, fale go tlide leri le lennyane, gomme tladi ya ratha lepokisi gomme ya mo rathaganyetša ka ntla ga lepokisi.

¹⁸⁶ Jehofa Modimo o a befelwa. Ke a tseba Yena ke Modimo wa go loka, eupša Yena ke Modimo wa kahlolo, gape. O sa lebelela, O a tseba.

¹⁸⁷ Ge o se na le Modimo, emiša seatla sa gago, e re, “Nkgopole, Ngwanešu Branham, ge o rapela.” Modimo a go šegofatše, mohumagadi. Modimo a go šegofatše, morwa. Yeo ke nnete, etla thwi pele. Modimo a go šegofatše. Yeo ke nnete, lesogana. Modimo a go šegofatše morago fale. O kgopela Ramaatlakamoka Modimo.

¹⁸⁸ Tate wa rena wa Legodimong, bjale O ba bone. Le a tseba go na le diatla tše masomepedi goba masometharo tše di bilego godimo, bao ba nyakago Wena bakeng sa Mophološi wa bona. Modimo, efa se feela bjale. Ke ba fa Lentšu le. O rile, Wenamong, “Yo a kwago Lentšu la Ka” Ke dirile bokaonekaone bjo ke kgonnego ka Lona, Morena. “Yo a kwago Mantšu a Ka gomme a dumela go Yena yoo a Nthomilego, o ne Bophelo bjo Bosafelego,

gomme a ka se tle kahlolong, eupša o fetile go tloga lehung go ya Bophelong.” A selo sa go makatša, go nagana seo! Ge dipelo tše di hlokofetšego ka morago ga diatla tše, ka kgonthe di be di era seo, se sengwe se nno direga. Bjale O rile, “Yo a tla Mpolelago pele ga batho, yena Ke tla mmolela pele ga Tate wa Ka le Barongwa ba bakgethwa.” A nke ba tsebe gore Wena o fa, Morena. Ke a rapela gore O tla e fa. Re kwe. Re bahlanka ba Gago, Morena. Leineng la Jesu.

¹⁸⁹ Go lokile, phagamiša hlogo ya gago. Le a dumela Yena ke Jehofa-Jireh? [Phuthego e re, “Amene.”—Mor.] A le a dumela gore re ka matšatšing bjalo ka ge go bile ka matšatšing a Loto? [“Amene.”] Matšatši a Noage? [“Amene.”] Le elelwa Molaetša wa mafelelo?

¹⁹⁰ A go na le yo mongwe mo lekga la bona la mathomo? Phagamiša seatla sa gago. Bontši! Ke a thankā Ngwanešu Borders o le hlalošeditše. Le kwele ka kopano pele, se se diregago. Emišang diatla tša lena, ge le dirile; ge le se la ke la e bona, le nno e kwa. Go lokile. Bjale ke mosetsebję go batho fa.

¹⁹¹ Ba bangwe ba lena batho ka bothata, rapelang Modimo, gomme le re, “Modimo, nkaooge, ke a babja. Ngwanešu Branham ga a ntsebe. Eupša ke a kwa gore O Moprista yo Mogolo yo a kgonago go kgwathwa ke dikwi tša mefokolo ya rena.” Ke ba bakae ba tsebago seo? [Phuthego e re, “Amene.”—Mor.] “Gomme O a swana maabane, lehono, le go ya go ile.” Le tseba seo? [“Amene.”] Gabotse, bjale, ge A le Moprista yo Mogolo wa go swana, O tla dira bjang ge o Mo kgwathile? Tsela ya go swana A dirilego ge mosadi ka taba ya madi a Mo kgwathile. O retologile go dikologa le go mmotša se taba ya gagwe ya madi e bego e le, le go mmotša tumelo ya gagwe e mo phološitše. A yeo ke nnete? Ke Yena yo a swanago bosegong bjo, ge le ka kgora go Mo dumela ka tsela ye e swanago ye A bego a le ka gora nako yela. A le Mo dumela ka tsela yeo?

¹⁹² Bjale le lebelela ka tsela ye, go nna. Bjalo ka ge Petro le Johane ba boletše Kgorong Ye Botse, “Re lebelele.” Seo e be e se “go ba lebelela go bona” go e ka ba eng, eupša, “lebelela se ba bego ba se bolela.”

¹⁹³ A re thomeng go tloga godimo *fa* felotsoko. Lebelela ka tsela ye, gomme dumela ka pelo ya gago yohle. Gomme o re, “Morena Jesu, ke a Go dumela, gomme ke nyaka go kgwatha kobo ya Gago. O bolela le Ngwanešu Branham, gomme mo dire a tsebe se bothata bja ka e lego. Ke tla Go dumela ge O ka e dira.” A o tla e dira?

¹⁹⁴ Bjale sese selo sa go amega. Nka leka bjang go dira selo boka seo? Ke tla ba se sengwe sa phošo ka nna go dira tlhohlo boka yeo. Ke hlohlile seo pele ga seripa sa milione wa batho, ka nako, ke sa kgone ebile go bolela leleme la bona. Eupša Yena ga se a ke a

nnyamiša. Gobaneng? O e tshepišitše! Le ke matšatši a mafelelo, gomme O tshepišitše se, gomme sese sona.

¹⁹⁵ Ke a tseba, bagwera, le bile le bontši go le gobatša. Le bile le bontši bja boekiši bja senama. Eupša a nke ke no bolela selo se tee go lena, e sego go holega ga ka, eupša go holega ga lena beng. Ka mehla ba na le seo. Eupša Modimo ga se a ke a ba le ba babedi lefaseng ka nako ya go swana, ga se a ke a dira. Eupša e nong go elelwa, go na le dikekišo tše ntši, eupša go na le Modimo wa nnete. Go na le Moya wo Mokgethwa wa nnete. Go na le Molaetša wa kgonthe wa Modimo, gomme woo ke gore Jesu Kriste o hwetše badiradibe, o tsogile gape go tšwa bahung, gomme o boile morago ka go Motho wa Moya wo Mokgethwa, go dira modiro wa go swana ka Kerekeng woo A o dirilego ge A be a le fa.

¹⁹⁶ Bjale, a Lentšu la Modimo ga le bolele se? Ka go Bahebere, Le rile, tema ya 4, Beibele e boletše gore, "Lentšu la Modimo ke le bogalegale, le maatla kudu go feta tšoša ya magalemabedi, le ripa go phuleletša," leo le ripago bobedi go tla le go ya, "gomme ebile le go moko wa lerapo, le Mohlathi wa dikgopolole le maikemišetšo a pelo." A yeo ke nnete?

¹⁹⁷ Ke ka lebaka leo Jesu a kgonnego go ema pele ga batheeletši le go ba botša. Bona Bafarisei ba rile, "Ke Beletsebubu." Jesu o retologile go dikologa. Ga se ba e bolele ntle kudu, eupša O ba boditše. Ke ka baka leo A kgonago go botša mosadi ka taba ya gagwe ya madi. Botša mosadi o bile le bannabagatša; gomme ge a dirile seo, morago O boletše. "Gobaneng, leo ke leswao la Mesia."

¹⁹⁸ Le a bona bjale go bowa, go bonagala ga Mesia magareng ga batho. Ke Moya wo Mokgethwa o beago Kereke komana.

¹⁹⁹ Ke nyaka o retolle hlogo ya gago. Le bona mosadi yola yo monnyane a obeletša godimo fale, a phagamela morago godimo, a dutše thwi tlase fa? Le bona Seetša sela godimo ga gagwe? O tlaišega ka kgatelelo ya madi a magolo. Yeo ke nnete. O apere roko ye bolou, mohuta wa go rwala digalase godimo ga sefahlego sa gagwe. Go motsotswana wa mafelelo, goba ye mebedi, o be a ikwela maikutlo a go se tlwaelege a borutho go mo dikologa. Yeo ke therešo. Bjale kgatelelo ya gago ya godimo ya madi, yeo e bego e go tshwenya kudu gampe, e go tlogetše. O a e amogela? Phagamišetša seatla sa gago godimo ge o dira.

²⁰⁰ O kgwathile eng? Moprista yo Mogolo. Bjale sepelang, botšišang mohumagadi. Ga se nke ka ke ka mmona bophelong bja ka. Ga ke tsebe selo se tee ka ga mosadi; eupša, yeo ke therešo. Ke be ke šeditše Seetša sela ge Se sepela go kgabaganya batheeletši ba, se ile thwi godimo le go tla morago, Seetša sa go kganya.

²⁰¹ A o a dumela? Atheraithise, bothata bja sebudula, ditlhakahlakano, letšhogo, bofokodi. Yeo ke nnete. Ga o tšwe fa. Lefelo le lennyane le bitšwago West Point. Yeo ke nnete. O a

dumela gore Modimo a ka kgona go mpotša gore o mang? Moh. Hardwick. Yeo ke nnete. Ge yeo e le nnete, emeleta ka maoto a gago. E go tlogetše. Jesu Kriste o go dira o fole.

²⁰² A le a dumela? [Phuthego e re, “Ee.”—Mor.] Batho ba lebeletše morago, bakeng sa yona. Mohumagadi šo o dutše thwi fa. Lebelelang, Seetša sela se sa swere godimo ga gagwe. A ga le bone Seo? Sese Sona. Šetšang.

²⁰³ Sesele Sona, le monna yola a dutšego thwi fale a ntebeletšego. Atheraithise. Dumela ka pelo ya gagwe yohle, Modimo o tla go dira o welwe ke maruru, mohlomphegi, le wena. Re basetsebane seng sa rená, eupša e sego go Modimo.

²⁰⁴ Mohumagadi yo thwi morago mo, a sotlegago ka hlogo ya go opa. Modimo, o se mo tlogele a e foša. O Modimo, ka hle. Mohumagatšana Morton, dumela go Morena Jesu Kriste. O go fodišitše go tšwa go hlogo yeo ya go opa. Le a bona, O be a ka se mo dumelele go feta kgauswi. Ke nyaka go le kgopela se sengwe. Bošego bja go feta ge ke boletše le yo mongwe ka moagong ka diaparo tša bona, o bile le maikutlo a go se tlwaelege ka kgonthé, gomme o be o makala ge eba e be e le wena, goba aowa. A ga se nnete? Phagamišetša seatla sa gago godimo. Ga ke bale monagano wa gago, eupša ke go botša se o bego o se nagana. Yeo ke nnete. Lehono O be a nyaka go ba le nnete gore e be e le wena. E tla go tlogela bjale, tumelo ya gago e go phološitše. Haleluya.

²⁰⁵ Lebelela mohumagadi yo a dutšego fa, a aperego roko ya magwadigwadi. A o na le karata ya thapelo, mohumagadi? Kgonthiša ya gago mong. A o a dumela gore go phatloga go tla go tlogela, o tla dirwa gore o loke? O a dira? Phagamišetša seatla sa gago godimo ge seo e le se e lego phošo ka wena. Go lokile. Dumela ka pelo ya gago yohle gomme o fole. Le bona se se lego go nna?

²⁰⁶ Mohumagadi thwi ka morago ga gagwe, o phagamišeditše seatla sa gagwe godimo, ka se sennyane... aowa, wa bobedi morago kua, a aperego roko ye nnyane ya go lebega botala, o sotlega ka bothata bja pelo. Ee. A o a dumela gore Modimo o tla go dira o loke? Seo se gabotse, bothakga. O tla dira ge o ka no e dumela.

²⁰⁷ Mohumagadi, wa bobedi godimo go tloga go wena, Mdi. Dillman fale. Ge o dumela gore Modimo o tla go fodiša bothata bjoo bja mogodu. Mdi. Dillman, dumela, gomme o tla ba le mogodu wa gago. Ke mogodu wa go tšhoga. E bile le wena nako ye telele, gagolo ge e sa le menophose o bile go wena. O bile le dilo tše dintši go go dirrela bothata bjo bontši, eupša go fedile bjale. Ge dilo tšela e le therešo, nno šikinya seatla sa gago go batho, gore ba kgone go bona. Ge ke sa tsebege go wena, tšwela pele o sišinya seatla sa gago. Jesu Kriste o go dira gore o loke.

²⁰⁸ A le a dumela? [Phuthego e re, "Amene."—Mor.] Ke eng? Jehofa-Jireh, Morena o ineela Yenamong Sehlabelo! Bjale batheeletši ka moka ba ba mohuta wa go swana go fifala go nna. Jehofa-Jireh o file Sehlabelo go yo mongwe le yo mongwe wa lena. A le a dumela?

²⁰⁹ Bjale lena fa bao le phagamišitšego seatla sa lena, etlang godimo fa gomme le eme fa feela motsotso. A le tla e dira? Jehofa-Jireh o file Sehlabelo. O phagamišitše seatla sa gago, gore o e dumetše. O bone fa, le go tseba. Go se kgonagale... Ke Sengwe! Lebelelang batho ba, ke ba bakae ba biditšwego. Ga ke tsebe bjale. Mohlomongwe šupa, seswai goba lesome, e ka ba eng e bilego, yeo e biditšwego. E ka no ya pele e eya. Eupša ge ke sa na le maatla, ke nyaka gore le tle, le amogele Kriste bjalo ka Mophološi wa lena. A o tla tsoga bjale le go tla, ge re opela, "Ke a tla, Morena, ke tla bjale go Wena"? A o tla tsoga bjale le go tla godimo mo, wena o phagamišitšego seatla sa gago lebakana la go feta? Le go ema go dikologa aletara mo, le go laetša gore ga o lewe ke hlong ka Kriste. O ka Bogeneng bja Gagwe. Etla bjale, gomme netefatša go batho gore ka kgontha o be o e ra, gore o nyaka go gopolwa ke Modimo, gomme o Mo amogetše bjalo ka Mophološi wa gago. Etla godimo bjale, ge bohole re ema le go opela.

Ke a tla, Morena!
Ke tla bjale go Wena!
Ntlhatswe, ntlhwekiše ka Mading
Ao a etšego go tšwa Khalibari.

²¹⁰ Etla pele ntle bjale, etla thwi fase mo. Re ya go rapela. O ka se tsoge wa ba bokgauswana bjo bo itšego go Yena ge o tloga.

Ke tla bjale go Wena!
Ntlhatswe, ntlhwekiše . . .

²¹¹ Etla thwi fase go tšwa lebatong la godimo. Yeo ke nnete. Etla thwi pele go theoga, ema thwi mo. Eba... Bjale, O rile, "Ge le ka Mpolela pele ga batho, yena Ke tla mmolela pele ga Tate wa Ka. Eupša ge o lewa ke hlong ka Nna, Ke tla go jelwa ke hlong," elelwa, Beibele, go tloga go Genesi go fihla go Kutollo. Etla bjale, yo moswa le wa kgale. A o ka tla? Leloko la kereke, goba aowa, etla bjale. A o ka dira? Amogela Kriste ge o sa le ka Bogeneng bja Gagwe.

Ke a tla, Morena!
Ke tla bjale go Wena!
Ntlhatswe, ntlhwekiše ka Mading
Ao a etšego go tšwa Khalibari.

²¹² E no tšwelapele, o opela. [Ngwanešu Branham o hama, *Ke Kwa Segalontšu Sa Gago Sa Go Amogela*—Mor.]

²¹³ Theetšang. A le ntumela go ba moprofeta wa Gagwe? Ga se ke ipolele seo pele. Ke a dumela ke ema le batho ba ba kwešišago le go tseba se ke lekago go se hwetša. Go na le batho ka mo ba

ba bolelago Bokriste, ba swanetše go ba thwi *mo*. Etlang, a le ka se ke? A nke ke le botšiše, le ya go tsoge bjang? Le ka se tsoge la amogela leswao le lengwe. Le ke Lona. O RIALO MORENA. A moprofeta wa Modimo a ka dira setatamente boka seo ge e be e se therešo? Le amogela leswao le legologolo la lena, le leswao la lena la mafelelo, pele ga go bonagala ga Kriste. Etlang! Lebaka le ke bolelago dilo tše, ga se ka ke ka bolela se ka kopanong e ka ba efe ye nngwe, Ke ikwela gore thwi mo ke sebakabotse mo sa se sengwe go direga. Ke ka baka leo ke bolelago ka tsela ye ke lego. Ke a dumela le a kwešiša. O ka se ye go dikologa, wa dira mohuta wa bodumedi, wa re, “Ngwanešu Branham ke modimo,” goba se sengwe go swana le seo. Le kwešiša se ke bolelago ka sona. Etlang bjale. Etlang. A nke ke le phegelele, Leineng la Kriste. Etlang!

²¹⁴ Wena yo a sa tsebego mo o emego, ga o na le nnete ka yona, e no ba bohlale, goba mohuta tsoko wa maikutlo; o llile, o llile, goba o—o bile le mohuta tsoko wa maikutlo. O se ke wa leka go fihla Kua godimo ka seo. Elelwang, ke a le botša Leineng la Morena, gore le lahlegile, le lahlegile gabohloko, gomme ga le tsebe. O se ke wa leka mahlatse, mogwera. Ke no bjala peu, gomme ke goga nnete. Modimo o tšea go oketša. Ga ke tsebe.

²¹⁵ A re inamišeng dihlogo tša rena, re bone ge A ka se mpotše. [Kgaetšedi o bolela ka leleme le lengwe le go hlatholla—Mor.] Le kwa seo.

Ke tla bjale go Wena!

Puruputša pelo ya gago mong.

Ntlhatswe, ntlhwekiše ka go . . .

²¹⁶ Leloko la kereke. Ge ke be ke eme kua, gomme ke nno ba le boitemogelo bja go tšoena kereke . . . ? . . . ke tla dira tsela ya ka fa feels ka pela ka fao ke kgonnégo.

²¹⁷ Elelwang, Moya o fa bohlatse gore re bofelong. Saense e rile, “Ke metsotsye meraro go fihla bošegogare.” Molaetsa le Beibebe di re, “Wona šo, selo sa mafelelo!” Tsošeletšo e a fela. Mojako o a tswalela. O tla ba ka ntle, wa kokota, gomme ga o kgone go tsena ka gare. Etla!

Modimo a go šegofatše, mohumagadi yo moswa. Bjale, a o bone seo?

Ke a tla, Morena!
Ke tla bjale . . .

²¹⁸ Modimo a go šegofatše. Yeo ke nnete, mohlomphegi. Yeo ke tsela, etla thwi fase go tšwa lebatong la godimo. Go tla ka methalo.

²¹⁹ Lentšu šele, bohlatse šebo. Moya šole, hlatse šeo. Gomme fa batho ba a tla, go bontšha gore re fa mo nakong ya bofelo.

Ke a tla, Morena!
 Ke tla bjale go Wena!
 Ntlhatswe, ntlhwekiše ka Mading
 Ao a elago go tšwa Khalibari.

Ke a tla, Morena!

²²⁰ Ba letile, ba biletša ba bangwe ka gare. “Ga ba rate gore e ka ba mang a lahlege; bohole ba ka tla tshokologong.” “Etlang,” o rile, “go Nna.”

²²¹ Ge le bile le pelaelo ka monaganong wa lena. Le swanetše go ba le kgonthe, bagwera. Tumelo e phethagetše.

... go tšwa Khalibari.

... Morena!

Ke tla bjale go ...

²²² Ba bangwe, masometlano go ya go masomešupa tlhano a batho ba kgobokane go dikologa. Bjale etlang. A nke ka moka ba ba swanetšego go tla. Go swara feela boteletšana gannyane bjale. Gobane, gosasa go ya go ba go phodišo Kgethwa. Moya wo Mokgethwa o boletše le nna, lebakana le lennyane la go feta, “O se bitše mothalo woo. Bitša aletara.” Ke tla Mo obamela le go dira bjalo ka ge A mpotša. Ke tseba bokaonana go feta go se e dire.

Ke tla bjale go Wena!
 Ntlhatswe, ntlhwekiše ka Mading
 Ao a etšeego go tšwa Khalibari.

Ka dihlogo tša rena di inamišitšwe bjale, ge re letile.

²²³ O Modimo, dumelela Moya wo Mokgethwa go sepelela ka gare go ba. Bao ba nyakago go tla godimo ka pele ga aletara, ba etella batho pele bjale go ya go tšhegofatšo. Gomme—gomme a nke Morena Modimo a e fe. Moya wa Modimo, o bolela.

²²⁴ Sepelelang ka gare, sepelelang ka gare. Etlang kgauswi bjale, yo mongwe le yo mongwe. “Soulo ye nngwe le ye nngwe, ya go gatelelwa ke sebe, go na le kgaogelo le Morena.” Etlang bjale. “Etlang ka tlase ga lefula la go hlwekiša, ba lahlegelwa ke dipatso tša bona tša molato tšohle. Go na le Mothopo o tladitšwe ka Madi, a ntšitšwe go tšwa ditšikeng tša Imanuele.” Ka tlhomphokgolo.

²²⁵ Ikwela khutšo yela godimo ga kopano bjale? Ke eng? Ke lehu, lehu go badiradibe. Bjale bašomi ba sebele ba sepelela ka gare go dikologa le bona bjale. Ke lehu, batho ba ba a hwa. Dibeibe di tšwele, di a hhaloša. Lehu le ya pele go dikologa aletara, gomme Bophelo bjo boswa bo tla tla ka morago ga lehu.

Go na le Mothopo o tladitšwe ka Madi,
 A gogilwego go tšwa ...

Oo, ka fao le tla nyakago go kwa yeo letšatši le lengwe, letšatši ge morethetho wa gago o emiša go rethetha!

Gomme badiradibe ba phonkgetše ka tlase ga
lefula leo,
Ba lahlegelwa ke dipatso tšohle tša bona tša
molato wa bona.
Ba lahlegelwa ke dipatso tšohle tša molato wa
bona,

Yeo ke yona, moisa yo moswa. Šegofatša pelo ya gago. Seo ke
se A bego a se letetše.

Gomme badiradibe ba phonkgetše ka tlase ga
lefula leo,
Ba lahlegelwa ke dipatso tšohle tša molato wa
bona.

²²⁶ Bjale a nke Bakriste ba ba laetšwego, ba sepelele godimo ge
re opela temana ya go latela. “Lehodu le le hwago le thakgetše
go bona Mothopo wola mo letšatšing la gagwe; fale a nke nna,
le ge ke le mobe bjalo ka yena, ke hlatswe dibe tša ka tšohle.” A
nke batho ba go laela bjale ba sepelele godimo kgauswi. Lena ba
le se nago kolobetšo ya Moya wo Mokgethwa, šuthelang godimo
kgauswi bjale. Ga le tsebe se Modimo a ka se dirago bjale mo
motsotsong. Sepelelang godimo bjale, ge re opela temana ya go
latela bjale.

Lehodu le le hwago le hlaletše . . . (Lentšu le
dirilwe go bonagala.)
Mothopo letšatšing la gagwe;

Oo, seo se gabotse, tšwela ntle thwi bjale. Etlal ge Meetse a sa
huduega.

. . . nna, le bobe bjalo ka yena,
Ke hlatswe go tloša dibe tšohle tša ka.
Ke hlatswe go tloša dibe tšohle tša ka,
Ke hlatswe go tloša dibe tšohle tša ka;

²²⁷ Yeo ke yona, bašomi. Etlang thwi ka gare. Bohle bale
gatelang godimo bjale bakeng sa go huduega ga Meetse. Etlang
thwi godimo.

. . . mobe bjalo ka yena,
Ke hlatswe go tloša dibe tšohle tša ka.

²²⁸ Bjale lena ba le nyakago go rapela, šuthelang godimo
kgauswi bjale gomme le be komana. Re ya go dumela gore
Modimo o ya go, lemoga se. O swanetše go! Yena Modimo yoo a
kgonago go hlatha kgopolو ya pelo! Elelwang, Jesu o dirile feela
seo nako ye nngwe ka toropongkgolo. Eupša O rile, “Bontši go
feta bjo le tla, dira.” Le a bona, o netefaditše Lengwalo la Gagwe
thwi! Sepelela ka gare bjale. A re rapeleleng batho ba ba lego mo
bjale. Motho yo mongwe le yo mongwe yo a tsebago mokgwa wa
go rapela. Ke ba bakae Bakriste ba ba tswetšwego gape ba lego
ka moagong? Phagamišetša seatla sa gago godimo. Bjale a nke

yo mongwe le yo mongwe a phagamiše diatla tša rena le go neela ditebogo bakeng sa batho ba.

²²⁹ Tate wa rena wa Legodimong, re neela ditebogo go Wena bakeng sa batho ba. Ke ba Gago. Ba a tla, go dira boipolelo. Ba tla go hwa ntle go bonamong le sebe. Ba ya morago, dibopiwa tše mpsha ka go Kriste.

²³⁰ Sathane, o lahlegetšwe ke ntwa! Modimo ke Jehofa-Jireh! Morena o file Sehlabelo, o file batho, o file pitšo ya aletara, o file Molaetša, o file mogau. Gomme Sathane o lahlegetšwe ke ntwa, Leineng la Jesu Kriste o lahlegetšwe ke ntwa!



JEHOFÀ-JIREH ³ NST62-0707
(Jehovah-Jireh ³)

Molaetša wo ka Ngwanešu William Marrion Branham, setlogong o abilwe ka Seisimane ka Mokibela mantšiboa, Julae 7, 1962, ka Municipal Auditorium ka Grass Valley, California, U.S.A., o tšerwe go tšwa go theipi ya go gatišwa ya makenete gomme o ngwadilwe ntle le go fokotšwa ka Seisimane. Ye ya North Sotho phetolelo e ngwadilwe gomme ya phatlalatšwa ke Voice Of God Recordings.

NORTH SOTHO

©2022 VGR, ALL RIGHTS RESERVED

VOICE OF GOD RECORDINGS, SOUTH AFRICA OFFICE
58 DISA ROAD, ADMIRAL'S PARK, GORDON'S BAY 7140 WESTERN CAPE
REPUBLIC OF SOUTH AFRICA

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Tsebišo ka tokelo-kgatišo

Ditokelo ka moka di bolokilwe. Puku ye e ka ngwalollwa godimo ga sengwalolli sa ka gae go šomišwa ke mong goba go fiwa ntle, mahala ntle le tefo, bjalo ka sedirišwa go gaša Ebangedi ya Jesu Kriſte. Puku ye e ka se kgone go rekišwa, go tšweletšwa gape ka bopepetla, go romelwa go website, go bolokwa go sedirišwa sa go bušetša, go hlathollelwa malemeng a mangwe, goba go šomišetšwa go kgopela ditšelete ntle le tumelelo ya go ngwalwa ya Voice Of God Recordings®.

Tshedimošo ye e Tseneletšeng goba materiale yo mongwe o leng gona, ka kgopelo ikopanye le:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org